

2 CORINTIOS

Pablo queédih ã túyat tútat

¹ Weém, Pablo, biíhdih daacát túttnit, yeéb Corinto tútchidih moón Jesúíhwādh wã wahna caá.* Dios ã náahat pah, Jesucristoíh doonádih ã naáwát túttni wã jamna caá. Nin náodih wahna, jwĩ úud panihni Timoteojĩh yeebdíh búde jwĩ túyat túttna caá. Bitá Acaya baácđih moón Jesúíhwābut nin wã daác wahnidih ĩ joyó naáh.

² Jwĩ íp, jwĩ Maáh Jesucristobut yeebdíh búde oinit, ĩ teo wáaca naáh, bícdih ñi túi jamat pínah niijná.

Ded pah yeejép yapat

³ Jwiítđih en jĩgahnit, Dios ãpĩ teo wáacna caá. Páant ã teo wáacachah, caán, jwĩ Maáh Jesucristo ã ípdih búde wēinit, “Jwiítđih búde oinit, ma teo wáacat túina caá, Paá”, niiját caá jwiítđih náahap.

⁴ Yeejép jwĩ yapachah, jwiítđih caanjéh ãpĩ túi teo wáacna caá, bitá yeejép ĩ yapachah, queédihbut jwĩ teo wáacat pínah niijná.

⁵ Nin baácboó Jesucristo jam láa, tubit yeejép át yapap wat jĩ. Āih túini doonádih bohéna, caán Jesús ã yapatji pah muntih jwiítbut dawá láa tubit yeejép jwĩ yapna caá. Jesucristoíh jamna, páant yeejép jwĩ yapachah, Dios jwiítđih búde ãpĩ teo wáacna caá.

⁶ Pánih yeejép yapna, yeebdíh jwĩ jéih teo wáacna caá, Diosđih chah ñi túi jenah joyát pínah niijná. Yeejép yapna, Dios jwiítđih ã teo wáacachah,

* 1:1 Hch 18.1

jwiítbut yeebdíh jwĩ jéih teo wáacna caá, ñi jǵahat ã yayát pínah niijná. Jwĩ yeejép yapat pahjeh muntih, yeebbút yeejép ñi yapachah, “Dios ã táí teo wáacipna caá”, niíj jenah joinít, caandíh ñi cádahcan niít.

⁷ Pánihna, “Weém yeejép wã yapat pahjeh muntih, queébtut yeejép ï yapna caá. Dios weemdíh búdí ã teo wáacat pah, queédihbut búdí ã teo wáacachah, caandíh ï táí jenah joí cádahcan niít”, wã niíj jéihna caá.

⁸ Bũũ wã úudwã panihnitá, nindih ñi táí náhninaá: Weém Asia baácboó jum láa, tubit yeejép wã yapap jĩ. “Wã jéih bũũjácana niít. Wã wũnbiipna caá.*

⁹ Weemdíh ï mao yohbiipna caá”, wã niíj jenah joyóp yuh jĩ. Obohjeéhtih, Diosboó páant át yapat túttup tajĩ, “Weemjéh wã jenah joyátjĩh wã jéih chájna caá”, wã niíj jenah joicát pínah niijná. Caán, chah wēpni jumna, wũnah bejnít dih jwũub booani jumna, weemdíh ã teo wáacat pínahboodíh bidat caá náahap.

¹⁰ “Wã jibipboó búdí tobohat ã jumũchah yuhna, Dios ã teo wáacachah, wã táí yapap jĩ. Túttimahbut, biíc yoobó muntih ã táí teo wáacatjĩh wã táí yapbiipna caá”, wã niíj jéih caá.

¹¹ Yeéb ñi úúbúchah, jwiít dih oinit, Diosboó ã táí teo wáacipna caá. Páant ã teo wáacat doonádih joinít, dawá úúbhnit, “Túina caá, Paá. Pablowádih mat táí teo wáacap wut be”, wēinit, ï niijbípna caá.

Pablo Corinto tútchiboó ã jwũub bejíhat

* **1:8** 1Co 15.32

12 Biquína ñijeéh jamnit weemdíh yeena caá ìt chãjap. Obohjeéhtih, tíccanjeh, wēinit, “Dios ã teo wáacatjĩh ã náahat pahjeh queétdih, bitadihbüt táinijeh wã pej jam bohénap jĩ”, wã niíj jéihna caá. Weém yeecanjeh, yeebdíh yoobópdih wã naáwáp jĩ. Wã jenah joyátjĩh nihcan, Dios weemdíh oinit, ã teo wáacatjĩh, ñijeéh wã táí jamap jĩ.

13-14 Yeebdíh naóh daácna, buocannijeh wãpĩ daácna caá, ded pah wã bohéátdih ñi táí jéihyat pínah niijná. Obohjeéhtih, buu wã naáwátidih ñi táí beh joi jwúhcan yahna, túttimah, ñi táí beh joyát pínahdih yeebdíh búdí wã náah yacna caá. Pánih beh joiná, jwĩ Maáh Jesús ã jwúub dei júúwúchah, “Pablo jwiitdih ã táí bohénap jĩ”, weemdíh wēinit, caandíh ñi niijbípna caá. Biíc yoobó yeebdíh wēinit, “Wã naóhniiji táini doonádih queét ì táí jepahap jĩ”, weembát Jesúsdi h wã niijbípna caá.

15-16 Páant ñi weñat pínahdih jéihnit, Éfeso tútchiboó jam jwúhna, “Queét Corinto tútchidih moón Jesúhwáidih juibí bohénit, Macedonia baácna bohénadi h wã bejbipna caá. Macedonia baácboó jamniiji Judea baácna jwúub bejat túut, queét Corintodih moondíh chéneji teo wáacat túut niijná, queétdih wã en yap bejbipna caá. Ì pebh jamni Judea baácboó wã jwúub bejat pínahdih jéihnit, queétboó weemdíh ì táí teo wáacipna caá”, wã niíj jenah joyóp yah jĩ. Obohjeéhtih, pánih jenah joiná yahna, wã jéih bejcap jĩ.*

17 Ñi pebhna wã bejat pínah doonádih joinít, wã juibíca h enna, “Pablo nih yáaniabeh tagaá”, ¿ñi niíj jenah joí níit?

* 1:15-16 Hch 19.21

18 Páant ñi niij jenah joicá bojoó. Dios ã niijátji pahjeh biíc yoobó ã chãjat pah, weembút yeeni nihcan caá.

19-20 Weém, Silas, Timoteojĩhbut Dios wãúh Jesucristo ded pah ã chãjatjidih yeebdíh jwĩ bohénap jĩ.* Jesucristo nin baácboó ã cãac jumat pínah jãtih, Diosboó ã wãúh ded pah ã chãjat pínahdih át naáwáp wut jĩ. Pánihna, Jesucristo ã ip ã naáwátji biíc yoobó át chãjap wut jĩ. “Jújuh Paá, ma chãjat tútatdih wã chãjbipna caá”, át niij jepahap wut jĩ. “Páant wã chãjcan niít”, át niijcáp wut jĩ. Pánihna, “Jesucristo chah Maáh caá”, jwĩ niij jéihna caá. Pánih caandíh táí jenah joinít, ã naáwátjih jepahna, Diosdih wēinit, “Yoobópdihi tigaá ã niiját”, jwĩpĩ niijná caá.

21-22 Jesucristodih jwĩ táí jenah joí cádahcat pínah niijná, Dios jwiítidih, yeebdíhbut ã táí teo wáacna caá. Áihwã jwĩ jumat pínah niijná, jwiítidih át ñiwip wut jĩ. Pánih ñíonit, jwiítidih búdí teo wáacat náahna, áih Túini Espíritudih át wahap tajĩ, jwĩih caolihboó ã jumat pínah niijná. “Dios pebhboó ñi jumachah, yeebdíh chah búdí ã táí chãjbipna caá”, Túini Espiritu jwiítidih ã niijíchah, jwĩ táí jéihna caá.*

23 Bũũ jwũhna, wã jenah joyátjidih wã jwũub túut nũũmátidih yeebdíh yoobópdihi wã naóhbipna caá. Wã yeenachah, Dios wĩih jenah joyátidih jéih beedáni, ã peéh chãjbipna caá. Yeebdíh enedih búdí wã bejihna yahna, “Weemdíh ennit, queét ĩ tíicbipna caá”, niij jenah joinít, ñi pebhboó bejcanjeh, nin Macedonia baácna wã jwĩih juyúp jĩ.

* 1:19-20 Hch 18.5 * 1:21-22 Ef 1.14

24 Diosdih jepahnit ñi jumachah, yeebdih tubit wutni dée ñijeéh wã jumihcan caá. Obohjeéhtih, ñijeéh táinijeh jumna, yeebdih búdí wã teo wáaquihna caá, Diosdih táí jenah joí cádahcanjeh, chah ñi weñat pínah niijná.

2

1 Con láa yeebdih enedih bejna nihna, ñi yéej chājat peéh jūihna, yeebdih búdí wāta jīgaha tagaá. Pánihna, Éfeso táтчiboó jumna, jib bejatdih jenah joinít, “Queétdih jwúb jīgahaíhcan, ï pebhna wã bej jwahcan niít”, wã niúj jenah joyóp jī.

2 Yeéb ñi jīgahachah ennit, weembát búdí wāta jīgah tagaá. Pánih míic jīgahanit, jwīta míic jéih jwúb weñacan tagaá.

3-4 Pánihna, ñi pebhna bej jwahcanjeh, ñi yéej chājatdih ñi cádahat pínah niijná, wã daác wahap jī. Ñi míic ámohat pínah jātih bejna nihna, búdí wāta jīgahap taga. Pánih búdí jīgahna, jūinít, yeebdih tíicahcan, yeebdih búdí wã oyatdih ñi jéihyat pínah niijná, páant wã daác wahap jī. Jwī jwúb míic enna, túat nūmnít, táinijeh ñi jumachah enna, wã táí wēibipna caá. Yeebbát ñi táí wēibipna caá. “Queétoó táí jepahnit, táinijeh ï jumbipna caá”, wã niúj jenah joiná caá.

Yéej chājnijidih ï jwúb waadát tútat

5 Ñijeéh jumni tubit yéej chājni weemdih ā jīgahanap jī. Yeebdih bácah chah āt jīgahanap taga.

6 Jáantjeh yeéb míic wáacnit, ā yéej chājat peéh, caandih bacanit, ñit jwúb waadát tútcap wut jī.

Páant ñi peéh chãjatdih náhninit, ã yéejatdih jĩgahna, ãt túut nuumúp wat jĩ.

⁷ Buu, ã yéejatdih quíib buudnít, caandíh ñi míic wáacapoó ñi jwúub waadát túutú. ã jĩgahat yayáchah, jwĩ Maáhdih ã cádahcat pínah niijná, caandíh ñi túi teo wáacá.

⁸ Caandíh táinjeh ñi jwúub pej jumúú, “Weemdíh í túi oina caá”, wěinit, ã niij jenah joyát pínah niijná.

⁹ Jãtih yeebdíh daác wahna, “¿Wã watuchah, í túi jepahmi niít?” niij jéihíhnit, wã daác wahap jĩ. Buu ñi jepahatdih jéihna, wã wěina caá.

¹⁰ Buu caán ã yéej chãjatjidih ñit jenah joí cádahap wat be. Weembút wã jenah joí cádahna caá. Caán weemdíh ã yéej chãjcah yuhna, yeebdíh teo wáacat túut niijná, Cristo ã enechah, ã yéejatjidih wã jwúub jenah joicán niít. Páant wã jenah joicát dih ennit, yeebbút ñi jenah joí cádahbipna caá.

¹¹ Páant caán ã yéejatjidih jwiít dih jwúub jenah joicát caá náahap, ã tíicat yayáchah, nemépwã í maáh, Satanás, ã náahat pah ã chãjcat pínah niijná. ã yéejatjidih páantjeh jenah joiná, Satanásdih jwĩta jepah tagaá. Satanás ded pah jwiít nihatdih ã yéej chãjihatdih jéihcannit jwĩ nihcan caá.

Titodih jwãáhcan, Pablo ã náhni dahwaat

¹² Éfeso tútchimant bejni Troas tútchina jaibínit, Cristoíh túini doonádih wã naáwáchah, dawá í túi joyóp jĩ. “Dios ã teo wáacachah, caandíh jepahnit dawá í jumna caá”, wã niij wěi jenah joyóp jĩ.

¹³ Páant wã jenah joiná yuhna, wã úud panihni Tito, ñi pebhna wã wahnidih jwãáhcan, weémboó búdí wã náhni dahwanap jĩ. Pánih náhni dahwanit, caanjíh moondíh “Wã bejna caá”, niijnít, nin

Macedonia baácboó caandíh bididih wã jũúwáp be.*

Cristo jwiít dih eníhcannidih ã yap yohat

¹⁴ Páant wã náhni dahwana yuhna, Cristoíhwã jwĩ jummatdih jenah joinít, Diosdih búdí wã wěina caá. Cristo Satanásdih yap yohni ã jumuchah, Satanás jwiít dih ã yéej chãjat tútuchah yuhna, Cristoíhwã jumna, jwiítbut caandíh yap yohnit jwĩ jumna caá. Dios nihatdih Cristoíh doonádih jwiít dih ã naáwát tútup be, Satanásdih Cristo ã yap yohatjidih ĩ jéihyat pínah niijná. Pánihna, Cristodih jéihnit, búdí wěinit, nihat caandíh ĩ túi jenah joiná caá.

¹⁵ Cristoíh doonádih jwĩ naóh peét bejechah enna, Dios búdí wěinit, “Wã wũúh Cristo panihnit ĩ jumna caá”, ã niúj jenah joiná nacaá. Biquína jwĩ naóhni túini doonádih joinít, túi jepahnit jumna, iiguípna bejat déejidih Dios ã túi abnit ĩ jumna caá. Obohjeéhtih, bitaboó, joiná yuhna, ĩ jepahcat peéh iiguípna bejnit pínah ĩ jumna caá.

¹⁶ Nin pah jwĩpĩ niúj naóh bohéna caá: “Cristodih ñi jepahcatji peéh iiguípna bejnit, tãbit yeejép ñi tubaat ã yaicán niít. Obohjeéhtih, Cristodih túi jepahnit, Dioíh túini pebhboó ñi bejechah, búdí ñi weñat ã yaicán niít”, jwĩpĩ niúj naóh bohéna caá. Páant, jwĩ niúj naáwáchah joinít, ĩjnit, biquína ĩ joíhchah yuhna, bitaboó ĩ túi wěi joiná caá. Obohjeéhtih, jwĩ Maáh Cristo jwiít dih ã teo wáaccach, ãih túini doonádih yoobóp dih jwĩ naóhchah, beh joicán, nihat ĩta wěi joicán taga.

* **2:13** Hch 20.1

17 Dios naáwátdih bita bohé jibnitboó, jíb náahna, yoobópdiĥ ĩ bohécan caá. Obohjeéhtih, páant ĩ bohéat pah jwiítboó jwĩ yee bohécan caá. Dios ā naáwát túutnit jumna, caán ā enechah jéihnit, yoobópdiĥ jwĩpĩ bohéna caá.

3

Pablowā Jesúhwādiĥ teo wāhniĥ ĩ jummat

¹ Bitā ĩ niiját pah, “Dedé jéihcat pínah weemdíĥ wihcan caá”, weémboó wā niijcán caá. Yeeb weemdíĥ túi jéihna, “Pablowā yoobópdiĥ ĩpĩ bohéna caá”, niij jenah joinít, páant bitā ĩ niij daác wahatdiĥ ñi náahcan caá. Yeebbát bitadiĥ páant ñi niij daác wahatdiĥ wā náahcan caá. Obohjeéhtih, bitadiĥ jéihcan, páant daác wahatdiĥ ñita náah taga.

² Yeebdíĥ jwĩ bohéniji túini doonádiĥ joinít, ñi túut nuumúchah enniĥ, “Dios ā teo wáacatjĩĥ Pablowā queétdiĥ ĩ naáwáchah joinít, ĩ jenah joyátdiĥ ĩt túi túut nuumúp taga”, bitā ĩ niij jéihna caá. Páant niij jéihnit, Dios ā bohéat túutnit jwĩ jummatdiĥbut ĩ jéihna caá.

³ Pániĥna, jwĩ túi bohénachah, ñi túut nuumátji doonádiĥ joinít, Cristo jwiítđiĥ ā bohéat túutatjidiĥ nihāt ĩ jéihna caá. Dios báadhni āiĥ Túini Espiritu ā teo wáacatjĩĥ, yeebdíĥ jwĩ naáwáchah, ñi túi jepahap ĩ. Cristoíĥ doonádiĥ jwĩ bohénachah joinít, ñi jwíiĥ túut nuumátji doonádiĥ bitā ĩ joyóchah, yeebboó queétdiĥ jwĩ daác wahat paniĥnit ñi jumna caá.*

* 3:3 Ex 24.12; Jer 31.33; Ez 11.19; 36.26

⁴ “Cristo jwiít dih ã wun wãhatjĩh Dios ã túi teo wáacna caá”, ñi niíf jenah joyóchah jéihna, jwiítboó “Túini Espíritu búdí ã teo wáacatjĩh Dios naáwát dih queétdih jwĩ túi bohénap jĩ”, jwĩ niíf wēi jenah joiná caá.

⁵ Páni h wēinit, “Weém wã jenah joyátjĩh nindih wã jéih chãjna caá”, niijcán, “Dios ã teo wáacatjĩh jeh wã buujána caá”, wã niíf jéihna caá.

⁶ Páant ã teo wáacatjĩh ãih jáap naáwát, túini doonádih wã túi naóhna caá. Jon jãtih Dios jeé naanádih ã daacátjidi h jwĩ nuowádih át jepahat túutap wut jĩ. Obohjeéhtih, caán máa wutatdih ã túi jepahat pínah wēpat queétboodí h át wihcap wut jĩ. Nin jáap naáwátboodí h jwĩ jepahat pínah niijná, Túini Espíritu jwiít dih ã teo wáacna caá, Diosjeéh jwĩ túi jumat pínah niijná.*

⁷⁻⁹ Dios ã wutatdih jeé naanádih daácnit, Moisésdih ã wãhuchah, Dios ã wēpatjĩh Moiséih móot búdí át yeh iiguíp wut jĩ. Moisés jeemánt ã jwúub dei jãwúwuchah, ãih móot yeh iigát ã baáj jwúub bejehah yuhna, quíib ihana, queét Israel jaimenáji caandí h ã jéih encap wut jĩ.* Jon jãtih Dios ã daácnit wutatdih ã wãhuchah, ãjeéh ã túi jumat pínah niijná, caandí h túi jepahat át náahap wut jĩ. Obohjeéhtih, ã túi jepahcatji peéh iiguípna ãt bejep wut jĩ. Páant ã jepahcah yuhna, Moisés ã naóhni wutat túini ã jumatdih júutna, Dios búdí ã yeh iigát át jígohop wut jĩ. Buu láa jáap naáwát, túini doonádih Dios ã naáwát túutuchah, Túini Espíritu jwĩ jepahat pínahdih ã teo wáacachah, chah túini jumna, chah yeh iigát panihni ã jumna

* **3:6** Jer 31.31 * **3:7-9** Ex 34.29

caá. Caán jeé naanádih ã daácni w̄tatdih jwĩ túi jepahcatji peéh iiguípna jwĩta bej taga. Caán w̄tatdih jepahcan, ãjeéh jwĩ jéih jamcah yuhna, caán w̄tatdih ã w̄huchah, Dios ã túi yeh iigát át jígohop w̄t jĩ. Obohjeéhtih, b̄uu láa Jesucristoíh túini doonádih jwĩ jepahachah, iiguípna jwĩ bejat déejidih, Túini Espíritu ã teo wáacátjĩh Diosjeéh jwĩ túi jamna caá. Pánihna, jáap dooná chah túini caá ã jam̄p.

¹⁰ B̄uu láa Jesucristoíh dooná jwiítidih búdí yeh iigní dée ã jamna caá. Obohjeéhtih, Moisésdih Dios ã daác w̄hni w̄tat jwiítidih yeh iigcánni dée ã jamna caá.

¹¹ Caán w̄tatdih ã w̄huchah, búdí yeh iigát maátcanjeh át jam̄ jwuh̄p w̄t jĩ. Pánihat pah, caán w̄tat túini jamna yuhna, b̄uudní pínah át jam̄p tajĩ. Obohjeéhtih, Jesucristoíh túini doonáboó ã b̄uudcán niít. Búdí yeh iigát ã jamuchah yuhna, máa w̄tatji b̄uudní pínah át jam̄p tajĩ. Pánihna, b̄uudcánni pínah jáap doonádih ã w̄huchah, chah búdí yeh iigát dée ã jamna caá.

¹²⁻¹³ Moisés ãih móot yeh iigát ã baáj jw̄ub bejchah, yégueh chóojĩh át jáhap w̄t jĩ, queét Israel jam̄ená ĩ encat pínah niijná. Obohjeéhtih, jwiítboó nin b̄uudcánni dooná chah iigní dée ã jamuchah jéihna, tíccanjeh, yoobópdih jwĩ naóhna caá.*

¹⁴ Queét Diosdih joííhcan, ĩih jenah joyátdih jáhat dée ã jamuchah, Moisés ã daacátjidih ĩt beh joicáp w̄t jĩ. B̄uu páantjeh caán daacátjidih ĩ en naáwáchah joiná yuhna, biíc yoobó ĩ jéih beh joicán caá. Cristodih jwĩ jepahachahjeh, caán jáhat déedih ã

* 3:12-13 Ex 34.33

yohna caá.

¹⁵ Yeebdíh wã jwúub naóhna caá. Búubut queét Israel jaimená jwí Maáh Cristodih jepahcan, Moisés ã daacátjidih páantjeh ã beh joicán caá.

¹⁶ Obohjeéhtih, det jwí Maáhdih jepahnitdih caán daacátjidih Jesúsboó ã túi beh joyána caá.

¹⁷ Jwí Maáhdih jepahnitdih Túini Espíritu ã jumna caá. Pánihna, jwiít Túini Espíritu jumnitdih Diosboó wēi ennit, “Queét yéejat peéh chājat wihcannit caá”, ã niijíchah joinít, “Moisés ã wutátjidih jwí túi jepahcatji peéh jwiítidih ã wihcan niít”, jwí niij jéihna caá. Pánih jumna, jāhat dée wihcah, Diosdih túi jéihnit, jwí úum úábhcan caá.

¹⁸ Jwiít Cristoíhwā móot jāhat dée wihcan, “Caánboó chah túini caá”, jwípí niij jenah joiná caá. Páant niij jenah joinít, ã weñat pínahdihjeh chājna, caán ã jummat pahjeh jummat túut niijná, yeó jáap jummat pah túi túut nuumná caá jwí chājap. Jwiítidih Túini Espíritu ã teo wáacachah, jwí túi túut nuumná caá. Pánih túinidih jwí túut nuuméchah ennit, “Queét chah túi jenah joiná caá ã chājap”, bitaboó jwiítidih ã niij jenah joibípna caá.*

4

Jesúh doonádih naóhnit ded pah ã jummat

¹ Túini Espíritu teo wáacni jumna, Dios weemdíh oinit, ãih jáap túini doonádih ã bohé jibat túutup jī. Pánih bohéna, bita weemdíh yeejép ã chājachah, jīgahna yuhna, wã bohé cádahcan caá.

² Ded pah wã bohéátdih nihat ã jéihyat pínah niijná, wāpí bih bohécan caá. Nihat joinít ã túi beh

* **3:18** Ro 8.29; Gá 4.19; Fil 3.10

joyát pínah niijná, yeecanjeh, ãih túini doonádih yoobópdih wãpĩ bohéna caá. Dios weemdíh wēi ennit, “Pablo ã túi bohéna caá”, ã niijná caá. Bitabut wã bohénachah joinít, biíc yoobó ipĩ niijná caá.

³ Obohjeéhtih, bita iiguípna bejnit pínah jumna, jāhat dée ã jumuchah, wã bohéatdih ĩ beh joicán caá.

⁴ “Cristo chah túini Maáh ã jumna caá”, jwĩ niij bohénachah, Diosdih jéihcannit ĩ maáh, Satanás queétdih ã beh joyát túutcan caá. ãih yeh iigát dih jāhat dée pah caá queétdih ã chājap. Dios ded pah ã jummatdih Cristojeh cāacwādih ã túi beh joyána caá. Caán Cristo Dios yoobát caá.

⁵ Pánih bohéna, “Weemdíh ñi weñeé”, niijcánjeh, “Jwĩ Maáh Jesucristoboodíh ñi weñeé”, wãpĩ niij naóh bohéna caá. Jwiít Jesús dih oina, ñi maáh dée nihcan, yeebdíh teo wāacnitjeh caá jwĩ jumup.

⁶ Jon jātih Dios nihatdih chājna, “Dipánapboó yeh iigát ã jumna naáh”, ãt niijíp wut jĩ. Caanjéh jwĩih caolihdih yeh iigát dée ã jummat túutna caá. Pánihna, Cristo, chah túini ã jummatdih jéihna, Dios biíc yoobó túini ã jummatdihbut jwĩ jéihna caá.*

Jesúh wã ãih wēpatjĩh ded pah ĩ chājat

⁷ Weémboó wēpcanni, oboh jumni wáam dah dée wã jumuchah yuhna, Jesucristoíh túini doonádih wã bohé jibat pínah niijná, Dios weemdíh ã ñíwip jĩ. Oboh jumni wáam dah diítboó chah túinidih jwĩpĩ yac ámohat dée wã bíbohna caá. Caán túini doonádih wã naáwáchah joinít, cāacwāboó ĩ túut numná caá. “Oboh jumni, wēpcanni wã jumuchah yuhna, Diosboó chah wēpni jumna, búdí ã teo

* 4:6 Gn 1.3

wáacachah, ì túi túut nuumúp be”, wã niúj jéihna caá. Bitabut, wēpcanni wã jumatdih jéihna, “Dios ã wēpatjĩh ì túut nuumúp be”, biíc yoobó ì niúj jéihna caá.

⁸ Biquí láana weemdíh tubit ì jũihñuchah yuhna, Jesúh túini doonádih wã naóh cádahcan caá. Biíh láa ded pah Dios ã weñat pínahdih jéihcanjeh, “¿ded pah wã chãjbi?” niijnít, búdí wã jenah joiná caá. Pánih búdí jenah joiná yuhna, weemdíh ã teo wáacachah, caandíh wã túi jenah joí cádahcan caá.

⁹ Biíh láa bita weemdíh eníhcan, Jesúh túini doonádih wã naáwát peéh, yeejép ì chãjna caá. Páant yeejép ì chãjachah yuhna, weemdíh cádahcanjeh, Dios ãpĩ teo wáacna caá. Biíh láa ì wan mao jwejni yuhna, ã teo wáacachah, booni páantjeh wã jumna caá.

¹⁰⁻¹¹ Nin baácboó Jesús ã jum jwuhuchah, cãacwã caandíh ìt mao yohop wut jĩ. Pánihna, weembút nin baácboó jum jwuhna, Jesúsdi h ì mao yohatji pahjeh, ãih túini doonádih wã naóh jibat peéh, weemdíhbut ì mao yohíhna caá. Obohjeéhtih, Jesucristo weemdíh ã túi wapachah, wã báadh jwuhna caá. Páant weemdíh ã teo wáacachah enna, “Jesúsboó báadhni, chah wēpni ã jumna caá. Caanjéh tigaá Pablodih wapni”, nihat cãacwã ì niúj jéihna caá.

¹² Weemdíh ì mawíhichah yuhna, yeébbó wã naóhni doonádih joinít, Jesucristodih jepahna, Diosjeéh páantjeh ñi túi jumbipna caá.

¹³ Tubit yeejép yapna yuhna, Jesucristodih wã túi jenah joí cádahcan níit. Jon jãtíh Davidbut yeejép ã yapachah, nin pah ãt niúj daacáp tajĩ: “Diosdih túi jenah joinít, ded pah ã naáwátidih wã

naóh yapanap be”, ãt niúj daacáp tajĩ.* ã túi jenah joyát pah muntih weembút jwĩ Maáhdih túi jenah joinít, áih túini doonádih wãpĩ naóh yapana caá.

¹⁴ Pánihna, Jesúih túini doonádih wã naáwát peéh bita weemdíh ĩ mao yohochah yuhna, caandíh wã túi jenah joí cádahcan niít. “Jesucristoíh jumna, caandíh jwũub booaniboó weemdíhbut ã jwũub boobipna caá. Pánih booanit, weemdíh ñijeéh ã jumupboó ã waadát túutbipna caá”, wã niúj jéihna caá.

¹⁵ Páant ã chãjat pínahdih jéihnit, yeebdíh teo wáacat túut niijná, yeejép yapna yuhna, wãpĩ bohéna caá. Wã bohéatdih dawá ñi joyóchah, yeebdíh oinit, Dios dawá iiguípna bejnit déejidih ã túi ubna caá. Pánihna, dawá caandíh “Túina caá, Paá”, ĩ niúj wěi naóhbipna caá.

¹⁶ Páant jwiítidih ã chãjat pínahdih náhninit, búdí wěina, Jesúih túini doonádih wã yabh naóhcan caá. Yeó jáap jumat pah wĩih bácah ã wěpca jũúwáchah yuhna, caandíh chah túi jenah joiná caá wã chãjap.

¹⁷ Nin baácboó jwĩ jum jwuhuchah, yeejép jwĩ yapatdih búdí wã jenah joicán caá. Obohjeéhtih, Dios pehbboó jwĩ juibínachah, yeejép yapat wi-hcah, chah túi wěinit jwĩ jumat pínahdih wã túi jenah joiná caá.

¹⁸ Nin baácboó jum jwuhna, dedé jwĩ enni buudní pínahjeh caá. Obohjeéhtih, Dios pehbboó jumnidih buu jwĩ jéih encah yuhna, ã buudcán niít. Pánihna, nin baácboó jwĩ ennidih búdí jenah joicánjeh, Dios pehbboó ded pah jwĩ jumat pínahdih wã túi wěi jenah joiná caá.

* **4:13** Sal 116.10

5

1 Nihat nin baácboó jumni buudní pínah ã jummatdih jéihna, “Jwĩih bácahbat buudní pínah ã jumna caá”, jwĩ niij jéihna caá. Jwĩ wunuchah, jwĩih bácah ã moópbipna caá. Obohjeéhtih, jwĩ wunat túttimah, Dios jáap bácah jwiít dih ã jwáub wũhbirna caá. Caán bácahjĩh jwĩ jwáub wuncan niit. “Pánih jumna, jáap bácahjĩh Dios pehbhoó jwĩ jumbipna caá”, jwĩ niij wēi jenah joiná caá.

2 Nin baácboó jum jwũhna, tabit yeejép yapna, biguí láana Dios pehbhoó búdí wã jumíhna caá.

3 Yégueh chóodih jwĩ dawíhat pahjeh ã wũhni pínah jáap bácahboodíh búdí wã pãina caá.

4 Bũu nin bácahdih yohíhcan yũhna, jáap bácahboodíh wã pãina caá. Nin baácboó jum jwũhna, wĩih bácah ã moopát pínahdih jéihna, Diosjeéh páantjeh jummat túut niijná, jáap bácah pínahdih búdí wã bidna caá.

5 Dios jwiít dih jáap bácah ã wũhat pínahdih jãtih ãt jenah joiijp taga. Pánihna, ãih Túini Espíritudih jwiít dih ã wũhuchah, caánboó “Yoobópdih jáap bácahdih meemdíh ã wũhbirna caá”, jwiít dih ã niij jenah joyát túutna caá.

6 Páant ã chãjat pínahdih jéihnit, úumcan, wã jĩgahcan caá. Bũu nin bácahjĩh jum jwũhna, Dios pehbhoó wã bej jwũhcan caá.

7 Pánih jumna, ded pah jwĩ yapat pínahdih jéih encan yũhna, Jesucristodih túi jenah joinít, “Ã niijátji pahjeh wã túi yapbirna caá”, wã niij jéihna caá.

8 Nin baácboó jum jwũhna, wã wunat pínahdih úumcanjeh, wēi jenah joinít, jáap bácahjĩh jwĩ Maáh Jesucristojeéh búdí wã jumíhna caá.

9 Pánihna, Dios pehbboó bejna, wã bej jwuhcanbut, biíc yoobó jwĩ Maáh ã weñat pínahdihjeh wã chãjìhna caá.

10 Japboó juibínit, jwiít nihat jwĩ Maáh Jesu-cristo pebhna jwĩ juibí ñuhbipna caá. Páant jwĩ juibí ñuhuchah, nin baácboó jumna, ded pah jwĩ chãjatjidih enniji jwĩ maáh ã ñiobipna caá. Páant ã ñiwichah, jwĩ jéih jweicán niít. Pánihna, biíc jwĩ Maáh ã weñat pínahdih ã túi chãjatji jíib, ã túi wēi naóhbipna caá. Obohjeéhtih, biíhboó ã túi chãjatji jíib, caandíh ã wēican niít. Páant jwĩ yapat pínahdih jéihna, jwiítidih túi chãjat caá náahap.*

Dios jwiítidih ã wēi enat

11 Dios ninboó ded pah jwĩ chãjatdih enna, caán ã weñat pínahdih jwĩ chãjatji jíib ã peéh chãjbipna caá. Páant ã peéh chãjat pínahdih úum yacna, búdí teo wáaquíhna, cãacwãdih wã wēp bohéna caá. Pánih bohéna, búdí oinit, wã teo wáaquíhatdih Dios ã túi jéihna caá. Pánihna, biíc yoobó ñi jéihyat pínahdih yeebdíhbut wã náah yacna caá.

12 Páant niijnít, “Dedé jéihcat pínah weemdíh wihcan caá”, wã niijcán caá. Obohjeéhtih, bitaboó ï yee naáwáchah joinít, “Nihcan caá. Pablo túi oinit, yoobópdih jwiítidih ã bohéna caá”, ñi niiját pínah niijná, páant wã niíj naáwáp be. Queét ï túi jígohatdihjeh wēi jenah joinít ï jumna caá. “Nihat jwiít judiowã ded pah jwĩ chãjatdih Pablobó joyáh bojna, ã bohéat túican caá”, ï niíj naóhna yuh caá. Páant niijnít, bita queétdih ï wēi enat pínahdihjeh ï jenah joyát ã túican caá. Obohjeéhtih, ded pah ñih caolíh ã jummatdih caá jenah joyát náahap.

* 5:10 Ro 14.10

13 Biquína weemdih jãihnitboó “Pablo tãbit yójah bohé jibna, jenah joicánni caá”, ï niij jãihna caá. Obohjeéhtih, Diosdih búdí weñáihna, páant wã bohé jibna caá. Bitaboó weemdih eníhcannit, “Pablo ã jenah joyátjãhjuh ã yee bohé jibna caá”, ï niijná yuh caá. Obohjeéhtih, yeebdih teo wáacat túut niijná, túi jenah joinít, yoobópdi wã bohéna caá.

14 Cristo jwiít dih búdí ã oyochah jenah joinít, caandih jepahna, wã túi bohéna caá. Pánih oina, caán Cristo biícjuh jwí yéejat jíib buúdáát dih ã jíib chãj beedá wũhat túut niijná, jwiít dih ãt wun wũhup wut jã. Caandih jenah joiná, “Wĩih pínah caá ãt wun wũhjuh taga”, niij jenah joinít, jwiít nihat jwí yéejat jíib ãjeéh wunnit panihnit caá jwí jumup. Jwí yéejat jíib buúdáát dih jíib chãj péanit panihnit jwí jumna caá.

15 Pánihna, Cristo nihat cãacwã jwí yéejat jíib ãt wun wũhup wut jã, caandih jepahnit, jwí náahat pah chãjnitji túut nuumnít, ã weñat pínahboodih jwí chãjat pínah niijná. Caán ã wunuchah yuhna, Dios ãt jwũub boonanap tajã.

16 Jwí Maáhdih jwí jepahachah, ded pah jwí jenah joyátdih ã túut nuumúp be. Jãtuh nin baác dih bóodih jenah joinít, ded pah cãacwã ï jigohatdihjuh ennit, “Túinit caá. Yeejépwã caá”, jwí niij en jwuhup be. Obohjeéhtih, buú páant jwí niij jenah joicán caá, buca. Jãtuh Cristodihbut pánih jenah joinít, “Caánboó cãacjuh caá”, wã niij jenah joyóp yuh jã. Buú caandihbut páant wã niij jenah joyátjidih wã túut nuumúp be.

17 Ded Jesucristodih jepahni, ãih jumna, jenah joyát túut nuumní ã jumna caá. Ded pah ã jenah

joyát túut nuumná, ded pah ã chãjatbut túut nuumní ã jumna caá. Jãtih ã weñat pínahdihjeh chãjni ã jumap be. Bua, túut nuumná, Túini Espiritu ã teo wáacachah, Dios ded pah ã weñat pínahboodih chãjni ã jumna caá, buca.*

¹⁸ Jwiítjeh páant jwí jéih chãjcah, Dios jwiít dih át túut nuumap taga. Jãtih, Diosdih eníhcannit jum jwuhna, ãjeéh jwí táí jum jwuhcap jĩ. Cristo ã wan wãhatjĩh jwí eníhcatdih Dios át cádahat túutap taga, ãjeéh jwí táí jumat pínah niijná. Pánih chãjnit, jwiít dih bitadilh át naáwát túutap be, queébtut caandih ĩ eníhcatdih cádahnit, ãjeéh ĩ táí jumat pínah niijná.

¹⁹ Nin pah caá ã niij naáwát túutap: “Nihat yéejnit jumna, Diosdih eníhcannit jwí jumna caá. Jwiít dih bádí bidnit, Jesucristo jwí yéejat jíib ã wan wãhatdih jwí táí jenah joyóchah, ãihwã chãjnit, jwiít dih ã táí pej jumna caá”, ã niij naáwát túutap jĩ.

²⁰ Pánihna, Jesúih jumna, cãacwãdih nin pah wãpĩ niij naóh yapana caá: “Yeebbát Jesucristodih jepahna, túut nuumnít, Diosjeéh ñi táí jumú”, wã niijná caá.

²¹ Jwí Maáh Cristoboó biícjeh yéejat wihcanni át jumap wat jĩ. Obohjeéhtih, ã yéej chãjcah yuhna, Diosboó caandih jwí yéejat jíib át wan wãhat túutap wat jĩ. Jwí yéejat jíib buudáátdih Cristoboó át jíib chãj beedá wãhup wat jĩ. Páant ã jíib chãj beedá wãhatdih enna, Diosboó jwiít Cristoíhwãdih ennit, “Queétdih dedé yéejat peéh ã wihcan caá. Wã wũúhdih wēi enat pahjeh muntih, queétdihbut

* 5:17 Jn 3.3-7; Gá 6.15

wã wêi enna caá, b̄ca”, ã niijná caá. Pánihna, Cristoíhwã jwĩ j̄m̄chah, Dios túini ã j̄mat pahjeh m̄ntih jwiít dihbut ã túi j̄mat túutna caá.

6

¹ Dios yeebdíh b̄dí oinit, teo wáacna, ñi yéejat peéh át yoh w̄h̄p taga. Jwiít, yeebút Diosdih teo w̄h̄nit j̄m̄na, nindih yeebdíh wã naóhna caá: ãihwã j̄m̄na, yeebdíh wã bohéátjidih ñi túi jepahaá. “Wã jepahna caá”, niijná yuhna, ã náahat pah ch̄jcan, dedé pínah ãta nihcan tagaá. Dios ã oyatdih yap yohnitjeh ñita j̄m̄ tagaá.

² Jon j̄atih Dios naáwát dih naóh yapani nin pah át niij daacáp tajĩ:

“Wã náahni yeó jáap yeebdíh b̄dí oina, ñi w̄b̄atdih jepahnit, wã teo wáacap jĩ. Pánih teo wáacnit, yeebdíh wã túi w̄b̄p jĩ, Dios ã niijná caá”, át niij daacáp tajĩ. *(Is 49.8)*

B̄u caá ã náahni yeó jáap ã j̄m̄p. B̄u yeebdíh ã túi w̄bat pínah niijná, caandíh jepahat caá náahap.

Ded pah Pablo ã j̄mat

³ “Bita wã bohéát dih ï jepahcan niít”, niijná, dedé yeejép ch̄jcan, yeejép w̄pĩ wéhecan caá.

⁴ Túinijeh w̄pĩ j̄m̄na caá, “Pablo Dios ã weñat pínahdijeh ch̄jna, caandíh túi teo w̄h̄ni ã j̄m̄na caá”, c̄acwã weemdíh ï niiját pínah niijná. Dawá láa bita weemdíh yeejép ï ch̄jchah yuhna, weémboó íjcanjeh wã j̄m̄na caá. Dawá láa moh yéejna yuhna, wã bohé cádahcan caá.

⁵ Nin pah caá yeejép wã yapap: C̄acwã weemdíh ï mawachah; nemat m̄w̄boó ï nemechah; dawá íjnit, míc wáac j̄inít, ï mao

yohat tútutachah, yeejép wã yapap jĩ. Weém búdí teona; quíib chei túbuchah yuhna, ñoca daa jũóhna; nuugúp wunna, yeejép wã yapap jĩ.*

⁶ Í náah chãjatdih jenah joicán, wã túi jumna caá. Yeebdíh teo wáaquíhna, jwĩ maáíh túini doonádih túi jenah joinít, ijcanjeh, wã túi bohénap jĩ, ñi túi beh joyát pínah niijná. Yeebdíh túi oinit, wã bohénachah, Túini Espíritu yeebdíh ã teo wáacatjĩh ñi túi jepahap jĩ.

⁷ Áih túini doonádih naóhna, yeecanjeh, Dios ã wẽpatjĩh wã bohénachah enna, caandíh teo wũhni wã jummatdih ñi túi jéihna caá. Yoobópdih Dios ã weñat pínahdih chãjna, “Pablo yeejép chãjni caá”, cãacwã weemdíh ã jéih niijcán caá. “Dios ã náahat pah, túinijeh ñi jumú”, bitadih wã niijíchah, wã túi jummatdih enna, “Pablo yee bohéna caá ã chãjap”, ã jéih niijcán caá.

⁸ Biquína weemdíh ã túi wẽi enechah, bita ã wẽi encah yuhna, biquína ã wẽi naáwáchah, bita yeejép ã naáwáchah yuhna, wã joyáh bojna caá. Yoobópdih wã bohénachah yuhna, biquína “Pablo yee bohéni caá”, ã niij naóh yacna caá.

⁹ Nihat cãacwã ã enepboó wã bohénachah, weemdíh jéihna yuhna, biquína weemdíh enah bojnít, “Oboh jumnijeh caá”, ã niijná caá. Bita weemdíh ã mawachah yuhna, wã báadh jwuhna caá. Í mao yohat tútutachah yuhna, páantjeh wã jum jwuhna caá.

¹⁰ Biquí láana jĩgahna yuhna, Cristoíh jumna, páantjeh wã wẽina caá. Moh yéejni jumna yuhna, bitadih túini doonádih bohéna, queétdih búdí jíib

* 6:5 Hch 16.23

ɟumni wāhat dée pah caá wā bohénap. Biíh pah bóonadih bíbohcan yuhna, Cristoíh ɟumna, búdí bíbohni dée pah wā wēina caá.

11 Yeéb Corinto tútchidih moondíh búdí oina, úumcan, tíccanjeh, ded pah yeebdíh búdí wā náah yacatdih wā túi naóh daác beedánap be.

12-13 Yeéb wā weh panihnit ñi ɟumuchah, oinit, yeebdíh wā naóhna caá. Yeebdíh wā oi cádahcan caá. Obohjeéhtih, yeéboó weemdíh ñi oi cádahap jĩ. Pánihna, yeebdíh búdí wā oyat biíc yoobó weemdíhbut ñi jwúub oyoó.

Jesucristoíh nihcannitdih ã pej ɟumat tútcat

14 Yeéb Jesucristoíhwā áihwā nihcannitboodíh ñi pej ɟumca bojoó. Túi pej ɟumnit pínah nihcan caá. Nindih ñi túi jenah joyoó: Ded Jesúsdi h jepahni, túinidih ãpĩ chājíhna caá. Obohjeéhtih, Jesúsdi h jepahcanniboó, yeejépdih ãpĩ chājna caá. Pánih ɟumna, biíc di h ĩ jéih ɟumcan caá. Yeejép chājni túi chājíhni boodíh ã yéjabipna caá. Túi chājíhni yeejépdih ã jéih yap yohcan níit. Ded Jesúsíh ɟumna, ã naáwát di h ãpĩ túi jenah joiná caá. Obohjeéhtih, Jesúsíh nihcanniboó nemépwā ĩ maáh ã naáwáchah joinít, ded pah Dios ã ɟumat di h ã jéihcan caá. Queét chénat pah ĩ jenah joyát máca h ã ɟumna caá. Pánih ɟumna, ĩ jéih míic pej ɟumcan caá.

15 Jesucristo Satanásjíh máca h míic ĩ jenah joyát ã ɟumuchah, ĩ jéih míic pej ɟumcan caá. Biíc yoobó Jesúsíhwā Satanáíhwājíhbut máca h míic ĩ jenah joyát ã ɟumuchah, biíc di h ĩ jéih ɟumcan caá.

16 Dios páantjeh ɟumni caá. Jwiít áihwā ɟumna, caandíhjih wēinit, jwĩ jepahna caá. Biíh di h wēinit, jepahna, áta túican tagaá. Jwiít Jesúsíhwā áihwā

nihcannitdih pej jumna, ï wēi jepahnidih jwiítbut jwĩ wēi jepahat dée ã tobohna caá. Pánih jumna, yeéb Jesúíhwã, Jesúíhwã nihcannitdih ñi pej jumca bojoó. Dios báadhni jumna, jwiít Jesúíhwã biíc dih, ãih m̄ pánihnit jwĩ jumna caá.* Jon jãtih ã naáwát dih naóh yapanit nin pah ït niúj daacáp tajĩ: “ Weémboó queétdih túi pej jumna, ï maáh wã jumbipna caá. Queétboó wĩihwã jumna, weemdíjhéh ï wēibipna caá’, Dios ã niijná caá”, ït niúj daacáp tajĩ. (*Lv 26.12; Jer 32.38; Ez 37.27*)

¹⁷ Bitá naóh yapanitbut nin pah ït jwáub niúj daacáp tajĩ:

“ Wĩihwã nihcannitdih ñi cádaháá. Queétdih ñi pej jumca bojoó. Íí náah ï chãjat déedih yeéboó ñi chãjca bojoó. Páant ñi cádahachah, weémboó yeebdíh wã wēi enbipna caá. (*Is 52.11*)

¹⁸ Pánih wēi ennit, ñi íip wã jumbipna caá. Yeéboó wã weh ñi jumbipna caá’, Chah Wēpni Maáh ã niijná caá”, ït niúj daacáp tajĩ. (*2S 7.14; 1Cr 17.13; Is 43.6; Jer 31.9*)

7

¹ Pánihna, wã oinitá, nindih ñi túi jenah joyoó: “Ñi yéej chãjatdih ñi cádahachah, yeebdíh wēi ennit, wã túi pej jumbipna caá”, Dios ã niijíchah joinít, nihat jwĩ yéejatdih jwĩ cádah jííh. Dios ã jíghat pínahdih chãjíhcan, yeejép jwĩ jenah joyát dih cádahat caá náahap. Pánih túut n̄m̄nít, túi jenah joiná, ã weñat pínahboodíh jwĩ chãj jííh.

* **6:16** 1Co 3.16; 6.19

Corinto tútchidih moón ã túút nuumát

² Weemdíh ñi jwúub oi jenah joyoó, páant muntih. Ñijeéh jumna, deddih wã yéej chãjcap jĩ. Bohéna, yeebdíh wã yéej chãjat túutcan, yeebdíh wã yee dúuc wáicap jĩ.

³ Páant niijnít, “Pablodih jwĩ táí oicatji jíib jwiít dih peéh chãjat ã jumna caá”, yeebdíh niij jenah joyát túutcan, “Pablo táí chãjni jĩ”, wã niij jenah joyát túutna caá. Wã jwíih niijátji pahjeh muntih, wã jwúub niijná caá: Yeebdíh búdí wã oina caá. Pánihna, ded pah yapna, wunna yuhna, biíc yoobó yeebdíh jenah joinít, wã oi cádahcan niít.

⁴ “Queét Corintodih moón táí chãjnit jumna, wã naáwát dih ã táí jepahbipna caá”, niij jenah joinít, búdí wã wēina caá. Pánihna, yeejép yapna yuhna, yeebdíh páantjeh wã wēi jenah joiná caá.

⁵ Nin Macedonia baácboó wã juyúchah, weemdíh chooát ã wihcap be. Páantjeh yeejép wã yapap be. Dawá jũihnitboó “Ma táí chãjcan caá”, weemdíh ã niij jũihñup be. “¿Queét Corintodih moón wã oinitboó ã táí jum niít?” niij jenah joinít, páantjeh yeebdíh búdí wã náhni dahwanap be.*

⁶ Obohjeéhtih, Dios jĩgahat yayániboó weemdíh teo wáacnit, Tito wã pebh ã juyúchah, weemdíh búdí ã weñanap be.

⁷ “Queét ã jwúub táí jumatdih enna, búdí wã weñep be”, weemdíh Tito ã niij naáwáp be. Páant ã niij naáwáchah joiná, weembút búdí wã weñep be. “Queét Corintodih moón Jesúíhwã meemdíh búdí ã bidna beé. ‘Yéej chãjnit, Pablodih búdí jwĩt jĩgahanap taga’, niij jenah joinít, queébtut búdí ãt

* 7:5 2Co 2.13

jĩgahap wut be. Pánih jĩgahnit, ma daác wahnidih ennit, it túi jepahap tabe”, Tito weemdih ã niij naáwáchah joinít, chah búdí wã weñep be.

⁸ Wã jwíih daácnijidih wah péanit, “Nin wã wēp naóh daacátjidih ennit, búdí ĩ jĩgahbipna caá. Páant wã wēp naóh daáccan, ãta túi taga”, niij jenah joinít, búdí wã jĩgah jwahup jĩ. Obohjeéhtih, buu ñi jĩgahat yayát doonádih joinít, weembút wã jĩgahcan caá.

⁹ Buu búdí wã wēina caá. Ñi jĩgahat doonádih joinít, wēina wã chājcan caá. Obohjeéhtih, jĩgahnit, táiniboodih ñi túut numát doonádih joinít, búdí wã wēina caá. Dios caá yeebdih át jĩgahat túutap taga, ñi jenah joyátdih ñi túut numát pínah niijná. Pánihna, wã daác wahniboó yéejacan, yeebdih át túi teo wáacap taga.

¹⁰ Dios ã náah yacat pahjeh jwí yéejatdih jĩgahna, yéej chājatdih jwí cádahbipna caá. Pánih jĩgahna, jwí jenah joyátdih túut numnít, táiniboodih jwí chājbipna caá. Páant jwí túut numúchah enna, iiguípna jwí bejat déejidih Diosboó ã túi ubbipna caá. Maátcanjeh jwí jĩgahna yuhna, túi túut numnít, búdí jwí wēibipna caá, buca. Obohjeéhtih, bitaboó ĩ yéej chājat jíib queétdih Dios ã peéh chājat pínahdih jĩgahna yuhna, túut numíhcan, iiguípna ĩ bejbipna caá.

¹¹ Yeéb Dios ã náah yacat pahjeh jĩgahnit, ñit túi túut numúp taga. ¡Ñi jenah joyoó! Nin pah caá ñi túut numát: Buu jwahna, ded yéej chājni ã yéejatdih enah bojcanjeh, yoobópdiñi ñi túut numát túutna caá. Ñi yeejép jenah joyátdih cádahnit, túut numnít, buu ñi túi jenah joyátdih wã jéihyat pínahdih weemdih ñi náah yacna caá. Pánihna,

weemdih ñi wēi jenah joi jwáhcatjidih bádí ñit jġahap wat be. Ñi yéejat jíib Dios ã peéh chājat pínahdih bádí úumna, túi túut nuumnít, weemdih jwúub eníhna, bádí ñit bidip wat be. Dios ã weñat pínahdihjeh ñit chājap wat be. Det yéej chājnitdih ñit peéh chājap wat be. “Buu, queét yoobópdi chājnit caá. Dedé yéej chājat peéh queétdih ã wihcan caá, buca”, wã niġ jenah joiná caá.

¹² Yeebdih daác wahna, yéej chājnidih ñi peéh chājat pínahdih, ã yéej chājatjidihbut jenah joicánjeh wã daác wahap jġ. Obohjeéhtih, Dios yeebdih enna, “Queét Pablodih yoobópdi oinit caá”, ã niġ jenah joyátdih ñi túi jéihyat pínah niijná, wã daác wahap jġ.

¹³ Páant ñi túut nuumátdih jéihnit, bádí wã wēina caá.

Tito ninboó jwúub juinít, weemdih nin pah ã niġ wēi naáwáp be: “Queét Corintodih moón ĩ túi túut nuumátdih ennit, wã jġahatji ã yayáh bejep jġ. Pánihna, bádí wã wēina caá”, ã niġjíp be. Páant ã niġjátdih joinít, weembát chah yeebdih wã wēina caá.

¹⁴ Tito ñi pebhboó ã bejat túut chājachah, nin pah caandih wã niġjíp jġ: “Queét Corintodih moón Jesúihwã nin wã daác wahnidih ennit, ĩ túi jepahbipna caá”, wã niġjíp jġ. Pánihna, ñi túi jepahatjidih jéihnit, Titodih jwúub ennit, wã tíccap be. Titodih wã niġjájti biíc yoobó át yapap wat be.

¹⁵ Tito ñi pebhna ã juibínachah, caandih túi wēi jwāáhnit, wã daác wahatdih ñi túi jepahatdih náhninit, yeebdih chah ã oi jenah joiná caá.

¹⁶ Buu túi jepahnit, Dios ã weñat pínahdihjeh ñi túi chājatdih jéihna, túttimah biíc yoobó ñi jepahat

pínahdihbut wã túi jéihna caá. Pánih jéihnit, búdí wã wěina caá.

8

Jesúhwã dinero wahnit, moh yéejnitdih ã teo wáacat

¹ Bũũ wã úudwã panihnitá, bíih naáwát ã jumna caá. Nin Macedonia baácdih jumni tútchinadih moón Jesúhwã míc wáacnit ded pah ã túi chãjatjidih yeebdíh wã naóhbipna caá. Díos queétdih oínit, búdí át teo wáacap taga.

² Queét tubit yeejép yapna yuhna, jwĩ Maáhdih túi jenah joí cádahcan, búdí ã wěina caá. Pánih túi jenah joiná, tubit moh yéejnit jumna yuhna, ñih dinerodih oicanjeh, bita chah moh yéejnitdih búdí ã wãh wáacap jĩ.

³ Weém ennijijeh tigaá yeebdíh wã naáwáp. Queét moh yéejnit yuhna, ã bíbohat pah bóo ã wãhup jĩ. Nihcan caá. Búdí pohba ã wãhup jĩ. ã náahatdih jíib chãjat pínahdihbut ã wãhup jĩ. Weémboó páant wã wãhat túutcah yuhna, queétjeh jenah joinít, páant bóo búdí weemdíh ã wãhup jĩ.

⁴ “Judea baácdih moón Jesúhwã moh yéejnitdih búdí teo wáaquíhna, nin pah bóo meemdíh jwĩ wãhndih queétdih ma wãhuú”, weemdíh ã niijíp be.*

⁵ Pánih wãhna, wã jenah joyát chah ã wãhup be. ñih dinerodih ã wãhat pínah jãtih, “Paá, ded pah ma weñat pínahdihjeh yoobópdi meemdíh wã chãj wãhbipna caá”, Díosdih ñt niijíp wut be. Páant ã ni-iját túttimah, “Dios ã wutuchah joinít, yeéb Jesúh

* 8:4 Ro 15.26

doonádih bohé jibnitboodih ded pah ñi náahatdih jwĩ táí teo wáacbipna caá. Ded pah ñi wutachah, jwĩ jepahbipna caá”, jwiít dih ñi niijíp be.

⁶ Nit Macedonia baác dih moón ñih dinerodih ñi wāhatdih jenah joinít, yeéb Corintodih moondihbut wā jenah joyóp be. “Ninjĩh moón búdí ñi wāhat pah queétbut ñi wāhat pínahdih ñi ámoh páña naáh”, wā niij jenah joyóp be. Páant niij jenah joinít, Titodih nin pah wā niijíp be: “Meém ñih dinerodih queéd dih mat wūh wáac jwíihat túutap wut jĩ. Pánih jwíihnit, nihat ñi wūh wáacni dinerodih ma jwúub ámohat tútat túat niijná, ñi pebhna ma jwúub bej páñaá”, Titodih wā niijíp be.

⁷ Yeéb táí chājnit jumna, jwĩ Maáh Cristodih ñi táí jenah joiná caá. Ā naáwát dih táí jéihnit, ñi táí naóh yapana caá. Caán ā weñat pínahdihjeh búdí chājihna, yeebdih jwĩ bohéat pah táí oinit, bitadih ñi teo wáacna caá. Pánih táí chājnit jumna, ñiñih dinerodih oicanjeh, moh yéejnit Jesúihwā dih teo wáaquihna, biíc yoobó yeebdih táí wāhat caá náahap.

⁸ Páant niijná, yeebdih wutna wā chājcan caá. Obohjeéhtih, nit Macedonia baác dih moón ded pah jĩgah ennit, moh yéejnitdih búdí ñi teo wáacatdih yeebdih wā naáwáp be, “Jwiítbut búdí jĩgah ennit, queéd dih chah jwĩ wahbipna caá”, ñi niij jenah joyát pínah niijná. Páant ñi wūhuchah enna, “Queét Corintodih moón bitadih táí jĩgah en teo wáacnit ñi jumna caá”, wā jéih niijbípna caá.

⁹ Jwĩ Maáh Jesucristo jwiít dih búdí oina, ā teo wáacatdih jwiít dih táí jenah joyát caá náahap. Nin baácboó ā dei jūúwát pínah jātih, Diosjeéh jumna,

nihat maáh ã j̄m̄uchah, caandíh dedé j̄dhdad ãt wihjican tagaá. Obohjeéhtih, nin baácboó dei j̄óhñit, ã maáh wēpatdih cádahna, jwiít dih teo wáacat túut niijná, moh yéejni ãt j̄m̄ap wat j̄i. Pánih teo wáacna, jwiítboó moh yéejnit j̄m̄na yuhna, ãjeéh jwī j̄m̄uchah, jwiít dihbut dedé j̄dhdad ã wihcan niít. Pánih j̄gah ennit, ã teo wáacatdih jenah joinít, jwiít dihbut biíc yoobó bitadilh j̄gah ennit, teo wáacat caá náahap.

¹⁰ Nin pah wã niij jenah joiná caá: Ñi jwíih jenah joyátji b̄u biíc jópchi ã yapna caá. Con jópchi, nin Macedonia baác dih moón ĩ jenah joyát pínah j̄atih, yeéb Judea baác dih moón Jesúihwã moh yéejnitdih jwíih teo wáaquíh jenah joinít ñit j̄m̄ap wat j̄i. Pánih teo wáaquíh jenah joinít, con jópchidih ñi wūhat pínah dinerodilh ñit ámoh jwíhip wat yuh j̄i.

¹¹ Pánihna, j̄atih túi wēinit ñi teo wáac jwíihat pah, b̄ubut biíc yoobó wēinit, ñi wūhat pínahdih wūh péaat caá náahap. Ded b̄udí dinerodilh bíbohni chah ã wūhu naáh. Obohjeéhtih, ded n̄amp bíbohni bainí ã wūhu naáh.

¹² Túi biíc yoobó wēinit, ñíh dinerodilh oicanjeh, wūhat caá náahap. Pánih wēi wūhndilh Dios biíc yoobó ã wēi enbipna caá. Obohjeéhtih, bí dée wihcanniboodíh “Dinerodilh ma wūhú”, Dios ã niijcán caá.

¹³ Judea baác dih moón Jesúihwãdih yeebdíh wūhat túatna, “Queét Corintodilh moón moh yéejnit ĩ j̄m̄u naáh”, wã niij jenah joicán caá. Obohjeéhtih, yeéb, queétbut biíc yoobó ñi túi j̄mat pínah niijná, páant wã wūhat túatna caá.

¹⁴ B̄u yeéb b̄udí bíbohñit j̄m̄na, queét bíbohcanitboodíh ñi jéih teo wáacna caá. Bíih

láa, yeéb moh yéejnit ñi jumuchah, queétboó bádí bíbohnit, yeebdíhbat ĩ jéih teo wáacbipna caá. Pánih míc teo wáacnit, nihat Jesúíhwã táí biíc yoobó jwĩ táí jumbipna caá.

15 Jon jãtih Moisés nin pah ãt niij daacáp tajĩ: “Chah bádí jeémát ojdih júi yacniboó ã ubni yeó jáap ã jeémát pínahdihjeh ã bíbohó be. Bainíjeh ubnibat caán yeó jáap ã jeémát pínahdihjeh ã bíbohó be”, ãt niij daacáp tajĩ.*

Titowã Corintona ĩ bejat

16 Yeebdíh wã oi teo wáaquíhat pah muntih, Dios Titodihbat biíc yoobó oi teo wáaquíhat ãt wũhup taga. Páant ã táí oi teo wáaquíhatdih ennit, “Túina caá, Paá”, wã niijná caá.

17 “Corinto tútchidih moondíh jwúub enedih ma bejeé”, wã niijíchah joinít, “Júu, wã bejmi caá”, ã niij wěi jepahap be. Caandíh wã naáwát pínah jãtih, yeebdíh bádí teo wáaquíhna, caanjéh ñi pebhna tub bejĩhni ã jumup be.

18 Caandíh pej jumni pínah biíh Jesúsdih jéihnidihbat ñi pebhna wã bejat túutna caá. ã pej jumni pínahdih nihat nin Macedonia baácđih jumni tútchinadih moón Jesúíhwã bádí ĩ wěi naóhna caá. “Caánboó Jesúíh doonádih táí bohéni caá”, ĩ niij wěi naóhna caá.

19 Pánih wěi naóhnit, Judea baácboó wã bejehah, weemdíh pej jum bejni pínahdihbat caandíh ĩ ñiwip be. Nihat yeéb Jesúíhwã ñi wũh wáacni dinerodih jwĩ juibí wũhuchah enna, “Queét biíh baácđih moón Jesúíhwã jwiítđih oinit,

* 8:15 Ex 16.18

dinerodih ï wahachah, búdí ma teo wáacna caá, Paá”, Diosdih ï niíj wēi naóhbiḡna caá.

²⁰ Ñi wāhni dinerodih jwī túi en daobíḡna caá. “Pablowā jwīih dinerodih yee dúuc wáina caá ït chāḡap taga”, ñi niíj jenah joicát pínah niijná, caán niḡat túi wēi ennidih Tитоjeéh wā wahna caá.

²¹ Pánihna, jwī Maáh ā enechah, bitabút ï enechah, yoobóḡdih túi chāḡihna, biíhdiḡbút Tитоjeéh wā wahna caá.*

²² Titowā ñi pebhna ï bejechah, biíhdiḡbút ïjeéh wā wahna caá. Caanbút jwī Maáhdih jepahni, túi teo wāhni caá. Dawá láa bitadiḡ túi oinit, ā teo wáacachah, wā enep be. Yeebdíh túi jenah joinít, “Queét Corintodih moón Jesúíhwā ïih dinerodih ï túi wāh wáacbiḡna caá”, wā niíj wēi naáwáchah joinít, caanbút yeebdíh teo wáacadih búdí ā bejihna caá.

²³ Nit caá ñi pebhna wā wahnit: Titodih ñi túi jéihna caá. Caán wā chéen caá. Jesúíhwādiḡ wā teo wáacachah, caán wājeéh teoni caá. Bita chénewāboó ñi pebhna ājeéh bejnitdih ñi túi jéih jwuhcan caá. Queét chénaḡ pah jwī Maáhdih túi teo wāhna, caandíh túi weñanit caá. Páant ï jumatḡchah enna, Jesúíhwā queétdih ï ñío wahap be.

²⁴ Pánihna, ñi pebhna ï juibínachah, queétdih ñi túi oi pej jumatḡ. Páant ñi oi pej jumatḡchah enna, ñi oyatdih wā naáwátji biíc yoobó ā jumatdih bita Jesúíhwā ï jéihbiḡna caá.

9

¹ Judea baácdiḡ moón Jesúíhwā moh yéejnitdih teo wáacat túut niijná, dinerodih wahat pínahdiḡ

* 8:21 Pr 3.4

yeéb jãtih ñitát jéih tagaá. Pánih jéihnit ñi j̄m̄uchah, bainíjeh wã jw̄uub naóh daác wahna caá.

² Yeéb bitadilh b́dí ñi teo wáaquíhatdih jéihnit, nihat Macedonia baácdih moón Jesúíhwádih b́dí niij wēi naóhna beé wã chãjap be. “Queét Acaya baácdih Corinto tútchidih moón Jesúíhwáboó con jópchi Judea baácdih moondih b́dí teo wáaquíhat ñ jenah joí jwíhip j̄i”, wã niijip be. Páant wã wēi naáwáchah joinít, queébtut Jesúíhwã moh yéejnitdih b́dí teo wáaquíhat ñ jenah joiná caá.

³ Dinerodih ñi ámohochah, ñ teo wáacat pínah niijná, nit biíc peihcannit jwí úudwã panihnitdih b̄u ñi pebhna wã wahna caá. Páant ñ teo wáacachah, weémboó ñi pebhna wã j̄uibínachah, ñi wūh wáac pãini dinerodih ennit, yeebdíh wã naáwátji biíc yoobó ã j̄matdih nihat ñ jéihbipna caá.

⁴ Biquína nin Macedonia baácdih moón wãjeéh ñi pebhna ñ j̄uibínachah, ñi wūhat pínah dinerodih ñi bíboh pãicah, wã naáwátji biíc yoobó ñi chãjcatdih enna, b́dí wãta tíic tagaá. Yeebbút b́dí ñita tíic tagaá.

⁵ Yeebdíh ñ teo wáacat pínah niijná, Titowádih ñi pebhna wã bej páñat túutna caá. “Moh yéejnitdih jwí teo wáacat túut niijná, nin pah bóo jwí wūh wáacbipna caá”, ñi niijníji dinerodih ñi túi bíboh páñat pínah niijná, ñ jéih teo wáacbipna caá. Páant ñi wūh wáac páñachah, ñi pebhna wã j̄uibínachah, yeebdíh jw̄uub wūhat túutat ã wihcan níit. Pánihna, ñi wēi wūhat pínahdih ñi túi bíboh páñaá.

B́dí wūhat caá náahap

⁶ Nindih ñi túi náhninaá: Ded daocánnibitjeh ã momochah, daocánnijeh ã ãbbipna caá. Obohjeéhtih, dawá momniboó dawá ã ãbbipna caá. Páant ã chājat dée pah, moh yéejnitdih teo wáacna, jwĩih dinerodih oinit, bainíjeh jwĩ wũhuchah, Diosboó jwiítidih bainíjeh ã wũhbipna caá. Obohjeéhtih, túi wēinit, bádí jwĩ wũhuchah, Dios jwiítidihbut chah bádí ã wũhbipna caá.

⁷ Yeéb ñíih dinerodih ñi wũh wáacachah, túi jenah joí, “Nin pah bóo caá weemdíh jwĩ Maáh ã wũhat túutap”, níj jenah joinít, ñíih dinerodih oicanjeh, wēi wũhat caá náahap. “Bita weemdíh ĩ wũhat túutachah, páant bóojeh caá wã wũhap”, niijcánjeh wũhat caá náahap. Bita ĩ niiját pínahdih jenah joicánjeh wũhat caá náahap. Páant, ñi túi wēi wũhuchah, Diosboó yeebdíh ã wēi enbipna caá.*

⁸ Ñi náahat chah Dios yeebdíh ã wũhbipna caá, ñi bíbohatjĩh bitadih ñi túi teo wáacat pínah niijná. Páant ã wũhuchah, chah dawádih ñi jéih teo wáacbipna caá.

⁹ Jon jãtih David nin pah ãt níj daacáp tajĩ: “Ded túiniboó moh yéejnitdih ã túi wēi wũhna caá. Páant ã wũhuchah, Dios caandíh ã jwũub wũhbipna caá, páantjeh bitadih ã jwũub túi teo wáacat pínah niijná”, ãt níj daacáp tajĩ. (*Sal 112.9*)

¹⁰⁻¹¹ Dios jwĩ momat pínah, jwĩ jeémát pínahdihbut wũhni,* bitadih ñi wũhat pínahdihbut yeebdíh bádí ã wũhbipna caá. Páant ã wũhuchah, bitadih chah ñi jéih teo wáacbipna caá. Dios yeebdíh chah ã wũhuchah, yeéboó túi wēinit, queét Judea baácđih

* **9:7** Lc 6.38 * **9:10-11** Is 55.10

moón moh yéejnitdih ñi wũhndih jwiít dih ñi wũh yapaat tút na caá. Páant ñi wẽi wũhchah enna, queét nihat Diosdih wẽinit, “Queét jwiít dih ã teo wáacat túina caá, Paá”, ã niij wẽi naóhbipna caá.

¹² Túi wẽi wũhnit, Jesúhwãdih búdí ñi teo wáacna caá. Páant ñi teo wáacachah, dawá Diosdih búdí ã wẽi naóhbipna caá.

¹³ Páant ñi túi wẽi wũhchah enna, yeéb Jesúhwã ñi jummatdih nihat cáacwã ã jéihbipna caá. Bitá Jesúhwã ñi túi chãjatjidih ennit, “Paá, queétboó Jesúh túini doonádih naóhnitjeh nihcan, túi jepahnit caá. Pánih jumna, jwiít dih, bita míhwãdihbut teo wáacat tút niijná, jwiít dih túi wẽinit ãh dinerodih ãt wahap taga. Páant ã jummatdih meemdih búdí jwã wẽina caá”, ã niij wẽi naóhbipna caá.

¹⁴ Queét Judea baác dih moón yeebdih jenah joinít, búdí oina, nin pah ã niij wẽi naóhbipna caá: “Paá, queét dih búdí oinit, ma túi teo wáacachah, queét jwũh jwiít dihbut búdí oinit, ã túi teo wáacap be. Pánihna, jwiít nihatdih búdí oinit, ma teo wáacatdih túina caá”, ã niijbipna caá.

¹⁵ Dios búdí oinit, teo wáacat tút niijná, jwiít dih wan wũhnit, ã túi abat pínah niijná, ã wũh Jesúsdih ãt wah deyajip taga. Pánih wahna, chah túini ã chãjatjidih jenah joinít, “Búdí ma teo wáacatdih túina caá, Paá”, caandih jwã wẽi niij jãh.

10

Pablo Jesús ã naáwát tút ni ã jummat

¹ Bũh nindih ñi náhninaá. Weém, Pablo, yeebdih jwãh bohénijeh tigaá. Obohjeéhtih, yeéb weemdih

nin pah ñi niíj yeena caá: “Pablo ninboó jwíjeéh jumna, cãacwãdih úumna, jéih naóhcanni pah ã jumna caá. Obohjeéhtih, biáboó jumna, úumcanjeh jwiitdih jũih naóh daác wahni caá”, ñit niíj yeenap wat be. Cristo cãacwãdih oinit, teo wáaquihna, íjcan táinijeh naóhni át jumap wat jĩ. Páant táinijeh ã naáwátji pah muntih weembút íjcan táinijeh yeebdih wã naóh daác wahna caá.

² Pánih íjcan táinijeh naáwíhna yuhna, yee naóhntdih wã wêp naóhna caá. Ñi pebhna wã juibínachah, ñi túi chãja chaáh, páant bóojeh, ñi yeeatdih ñi cádaahá, “Pablo jwiitdih jũihná”, niijná. Ñi cãtíh jumnit, weemdíh nin pah ĩ niíj yeena caá: “Diosdih jepahcannit ĩ jenah joyát biíc yoobó Pablobut ã jenah joiná caá. Pánih jenah joí bohéna, Cristodih weñaihcan, ã weñat pínahdijeh ã bidna caá. Pánihna, Cristo ã naáwát túutni nihcan caá”, queét ĩt niíj yeenap wat be. Páant niijnítidih búdí wã jũihbipna caá.

³ Diosdih jepahcannit míic naóhna, queét ĩ jenah joyátjĩhjah chah ĩpĩ niijná caá. Obohjeéhtih, weembút cãacjeh jumna yuhna, queét ĩ chãjat pah weémboó wã chãjcan caá. Weemdíh yeejép naóhntdih Dios ã wêpatjĩh caá chah wãpĩ niijíp.

⁴ Pánihna, Diosdih yap yohnitdih weém túi yoobópdiwã wã wêp naóhna caá, ĩ yap yohatdih ĩ cádahat pínah niijná. Pánih wêp naóhna yuhna, wã jenah joyátjĩhjah wã jéih cádahat túutcan caá. Obohjeéhtih, Dios ã wêpatjĩh ĩ yap yohatdih wãpĩ cádahat túutna caá. Caandíh yap yohnit, ĩ jenah joyát yeejép ã jummatdih Dios ã wêpatjĩh ni-hat cãacwãdih wã jéihyana caá, yeejép ĩ jenah joí

cádahat pínah niijná.

⁵ “Nin pah caá Dios ã jummat”, niij yee naóhndih ã wēpatjīh wā cádahat túutna caá. Cāacwā Diosdih ī jéihyat déedih jāhat panihndih ã wēpatjīhjah wā jéih yohna caá. “Maá Jesús, weemdih ma túi teo wáacá, meemdih yap yohcanjah, yeejép wā jwáub jenah joicát pínah niijná”, jwiít nihatdih niiját caá náahap.*

⁶ Ñi pebhna wā juibínachah, yeejép jenah joicánjah, caandih ñi túi jepahatdih enna, det jwī Maáhdih yap yohna, páantjah yeejép jenah joinítboodih búdí wā peéh chājbiḡna caá.

⁷ Yeéb wīih bácahdihjah ñi jéihna caá. Obohjeéhtih, wā jenah joyátboodih ñi jéihcan caá. “Weem caá Cristo ã naáwát dih naóh yapaat túutni”, ded niijnídh nin pahbut niij jenah joyát caá náahap: “Pablobut biíc yoobó ã naáwát dih naóh yapaat túutni caá”, ã niij jenah joyó naáh.

⁸ Obohjeéhtih, yeéb nin pah ñi niijná caá: “Pablo nin pah ã niijná caá: ‘Corintodih moondih Dios weemdih bohénadih ã bejat túutap be’, niijnít, jwiít dih maáh dée ã jumna caá”, ñit niijíp wut yah be. Obohjeéhtih, ã bohéat túutni jumna, wā tíccan caá. Dios beé ñi pebhna weemdih ã bejat túutap be, áih túini doonádih naóhna, yeebdih wā teo wáacat pínah niijná. Páant ã naáwát túutni jumna, yeebdih yéejáihcan, ñi túi jummat pínah niijná, áih wēpatjīh yeebdih wā bohénap jī.

⁹ Pánihna, wēp naóh daác wahna yahna, yeebdih úumáihcan, ñi túi túut nuumát pínah niijná, yeebdih wā daác wahap be.

* 10:5 Ef 6.11-17

10 Biquína ñijeéh jumnit nin pah ït niijíp wut yah be: “Pablo naóh daác wahna, úum náah jumni maáh dée pah tab wēpép ã wutna caá. Obohjeéhtih, ninboó jǎóhna, oboh jumnijeh ã jumna caá. Pánihna, ã bohéni doonábut oboh naáwátjeh caá”, ït niijíp wut be.

11 Páant ï niijíchah yahna, ï niiját pah wã nihcan caá. Wã wēp naóh daác wahat pahjeh muntih, ñi pebhna jubínit, ñi túi túut nuumát pínah niijná, biíc yoobó wēp naóhni wã jumbipna caá.

12 Biquína ñijeéh jumnit, túi jéihcan yahna, “Bitá ï jéihyat chah jwiítboó jéihnit caá. Bitá Diosdih ï teo wáhat chah teo wáhnit jwí jumna caá”, ït niij míc weñep wut yah be. Obohjeéhtih, páant niij wēina yahna, túi jenah joicánnit, Diosdih túi teo wáhnit nihcan caá. Queét ï jenah joyát pah weémboó wã jenah joicán caá.

13-14 Weém cáacwã ï maáh nihcan caá. Obohjeéhtih, jwí Maáh Jesucristo ã wutatdih jepahnit, caandih teo wáhnijeh caá. Yeebdih bohénadih ã jib bejat túutuchah, wã jepahap jĩ. Wã jenah joyátjeh nihcan, Diosboó weemdih ã wahachah, yap yohcanjeh, ã wutatdih wã jepahap jĩ. Páant ã wutatdih jepahnit, Jesúih túini doonádih yeebdih jwíih bohéni wã jumap jĩ. Pánih jwíih bohéni jumna, weemdih wēp naáwát caá náahap. Ded pah wã bohéat pínahdih jwí Maáh weemdih ã naáwáchahjeh joinít, wãpĩ bohéna caá. Wã jenah joyátjeh wã bohécan caá.

15 Yeebdih yee bohénitji ï wēi niiját pah, weémboó wã wēi niijcán caá. Bitá ï bohénitjidih ennit “Queétdih weémboó wã túi bohénachah, Cristodih ït jepahap taga”, wã niij wēican caá.

Wã tewatdihjeh wã wěi naóhna caá. Yeebdíh jwíih bohéni jumna, Cristodih chah ñi jenah joyát pínahdih wã náah yacna caá. Pánih náah yacna, ñi pebhna jwáub bohénadih wã bejihna caá.

¹⁶ Pánih bohénit, jwí Maáh ã weñat pínahdih ñi túi chãjachah ennit, biíh tútchinadih moondíhbut bohénadih wã bejbipna caá. Pánihna, ñíih baác yehboó bejnit, bita bohé jwáhcanitboodíh wã naóhbipna caá. Jesúih doonádih joi jwáhcanitdihjeh naóhna, bita ñ bohénitjidih “Wã túi bohéátji jíib queét jwí Maáhdih ñ túi péena caá”, wã niijcán niít.

¹⁷ Páant niijnít, jon jãtíh Dios naáwátidih naóh yapani nin pah át niij daacáp tají: “ ‘Weemdíh dedé jhdhdát wihcan caá’, ñ niijcá bojo naáh. Obohjeéhtih, ‘Jwí Maáh Dios, nihat jéihni, weemdíh ã túi teo wáacáp be’, ñ niijí naáh”, át niij daacáp tají.*

¹⁸ Det queétjeh “Jwiít caá túi bohénit”, niij jenah joinítidih Dios ã wěi encan caá. Obohjeéhtih, “Caán caá túi bohéni”, jwí Maáh Cristo ã niijníboodíh Dios ã túi wěi enna caá.

11

Yeenit ñ bohéát ã tobohat

¹ Ded ã túi chãjatjidih bitadih ã wěi naáwáchah, ãpí túican caá. Páant naáwát ã túicah yahna, ded pah wã chãjatdih bita yeebdíh ñ yeeatdih wã naóh yoobábipna caá.

² Weém jíi Jesúih táini doonádih yeebdíh wã jwíih bohénap jí. Dios yeebdíh búdí ã oyat biíc yoobó weembút yeebdíh wã oina caá. Pánih oinit,

* **10:17** Jer 9.24

Cristodih jepah cádahcan, ãjeéh biíc dih ñi jumatdih yeebdih búdí wã náah yacna caá.

³ Obohjeéhtih, bita yeejép ì bohéatdih yeéb ñi joyát pínahdih búdí wã úum yacna caá. Jon jãtih mai pah jígohni Satanás Evadih búdí ãt yee naáwáp wut jĩ. Páant ã yee naáwát dih jepahnit, Eva Dios biíc dih mi jumatdih mit cádahap wut jĩ. Páant ã yeeatdih mi jepahatji dée pah muntih, bitaboó ì yee bohéatdih yeebbút jepahnit, Cristodih ñi cádahíhatdih búdí wã úum yacna caá.*

⁴ Det wã bohéatji pah bohécan, “Jesús nin pah jamni caá”, niij yee bohénadih ñi pebhboó ì juibínachah, ñit wëi jwãáhji tagaá. Yeebdih wã bohéatji biíc yoobó ì bohécah yuhna, ¿Dépanihna jenah joicánjeh, queétdih ñi jepah? “Nin pah caá Túini Espíritu ã chãjap”, ì niij yee bohénachah, ñit joiij tagaá. Caandih wã naáwátji biíc yoobó ì naóhcah yuhna, ¿Dépanihna queét yee bohénitboodih yeéb ñi jepah? Jesúh túini doonádih wã naáwát túttimah, ¿Dépanihna yeéb yee naóhnitboodih ñi túi joí? Páant ñi chãjachah enna, Cristodih ñi pée cádahat pínahdih wã úum yacna caá.

⁵ Queét yee bohénit “Jwiítboó Dios ã bohéat túutnit bita ã wahnit चाह jéihnit jwí jamna caá”, ì niijíchah yuhna, “Weém Dios ã bohéat túutni wã jumuchah, weemdih चाह jéihnit nihcan caá”, wã niij jenah joiná caá.

⁶ Túi wéheni nihcan yuhna, Dios naáwát dih túi beh joiní caá wã jumup. ã naáwát dih wã bohénachah joinít, páant wã jumatdih yeéb ñi túi jéihna caá.

* **11:3** Gn 3.1-5; 13

7 Nindih ñi túi jenah joyoó: Yeebdíh Jesúih túini doonádih bohéna, wãpĩ jíib úbhcap jĩ. Páant wã bohéat jíib úbhcanjeh, moh yéejni dée wã jumap jĩ. Pánih jumna yuhna, yeéboó moh yéejcanjeh, ñi túi jumat pínah niijná, yeebdíh wã túi teo wáacap jĩ. Pánih teo wáacna, ¿yeebdíh wã túi chãjcanit beé? ¿Weembút yeebdíh jíib wã niij jĩh, queét bita bohénitdih ñi wēi enat pah, weemdíhbat ñi jwúub wēi enat pínah niijná?

8 Obohjeéhtih, yeebdíh wã bohénachah, biih tútchinadih moón dawá Jesúihwã ñijeéh wã jumat pínah niijná, ñih dinerodih weemdíh ñ wũhup jĩ. Yeebdíh teo wáacat túut niijná, ñ wũhni dinerodih nuumát dée wã chãjap be.

9 Ñijeéh jumna, bií dée bíbohcan yuhna, yeebdíh dinerodih wãpĩ úbhcap jĩ. Jwĩ úudwã panihnit Macedonia baácđih moón Jesúihwã ñi pebh wã jumachah, nihat wã náahatđih ñ ub juibínap jĩ. Páant ñ ub juibínachah, yeebdíh dinerodih wã úbh tac buugácap jĩ. Túttimahbat, yeebdíh wã úbh tac buugácan niit.*

10 Cristo yoobópdih ã naáwát pah, weembút ãih jumna, yoobópdih nindih wã naóhna caá: Jesúih túini doonádih jíib wihcanjeh yeebdíh wã bohéatđih búdí wã wēi naóhna caá. Biíc yoobó jíib wihcanjeh wã bohéat pínahđihbat nihat ñíh baácđih moondíh jéihnit, páant wã wēi naáwátđih joinít, “Caán dée ãpĩ chãjcan caá”, ñ niijcán niit.

11 Yeebdíh dinerodih wã úbhcatjidih jenah joinít, ¿ded pah tigaá ñita niij jenah joí? “Pablo jwiítđih jíib úbhcan, jwiítđih ã oican niit”, ¿ñi niij

* 11:9 Fil 4.15-18

jenah joí niít? Nihcan caá. Yeebdíh búdí wā oina caá. Páant wā oyatdih Dios ã jéihna caá.

¹² Jíib wihcanjeh páantjeh yeebdíh wā bohébiḡna caá, queét yee bohénitboó “Pablo ded pah yeebdíh ã bohéát bíic yoobó caá jwiítbut jwĩḡḡ bohéna caá”, ĩ yee niijíchah joinít, queét dih ñi joyáh bojat pínah niijná. Queét yee bohénit ĩ bohéátji jíib yeebdíh ĩḡḡ wáhbna caá. Obohjeéhtih, weémboó wāḡḡ jíib wáhbcan caá. Pánihatdih túi jenah joinít, mácah jwĩ jumatdih ñi túi jéihbiḡna caá.

¹³ Pánih chājnit yoobóḡdih Jesús ã bohéát túutnit nihcan, queét yeenitjeh caá. “Jwiít caá Jesús ã bohéát túutnit”, niij naóhna yuhna, ã wahnit nihcan caá. Páant niijná, wā jumat dée pah ĩ jumíhip yuh caá.

¹⁴ Pánihna, yeenit jumna, páant ĩ chājat pínahdih wāát jéihyep be. Yeejéḡwā ĩ maáh Satanásbut bíic yoobó āḡḡ chājna caá. Dawá láa caanbút yeena, túini ángel, Dios ã wahnit pah ã míic jíghana caá.

¹⁵ Satanás ã chājatdih jéihna, caandíh teo wāhnitbut “Jesús ã wahnit caá”, niij yeenit, Diosdih teo wāhnit pah ĩ jumíhatdih wāát jéihyep be. Túi chājcannit jumna yuhna, túi chājnit dée pah ĩ jumíhna caá. Pánihna, Diosboó nihat ĩ yeeatji jíib queét dih búdí ã peéh chājbipna caá.

Pablo yeejéḡ ã yapatji

¹⁶ Bḡḡ jwuhna, ded pah wā jumatjidih wā wēi naóhbiḡna caá. “Pablo ã túi chājatjidih tub wēi naóhniabeh caá”, weemdíh ñi niij jenah joicáh, ã túimi nacaá. Obohjeéhtih, weemdíh páant niij jenah joiná yuhna, ded pah wā yapatjidih wā wēi naáwáchah, bainíbit ñi joi jwáhuá.

17 Yeebdíh pánih naóhna, jwĩ Maáh Jesús weemdíh “Ma yapatjidih ma naáwá queétdih”, ã niijcáh yuhna, ded pah wã yapatdih wã naóhbiḡna caá.

18 Dawá bitaboó ded pah ĩ túi chājatjidih wēi naóhna, weembút ded pah wã yapatjidih wã wēi naóhbiḡna caá.

19 Yeebboó “Chah túi jéihnit jwĩ jumna caá”, ñi niijjenah joiná yuh caá. Obohjeéhtih, yee naóhniḡboó ĩ naáwáchah yuhna, ñi túi wēi joiná caá.

20 Queét ñi maáta dée, yeebdíh búdí ĩ wutuchah, ñi túi wēi joiná caá. Dawá láa ñíih dinerodih ĩ yee dúuc wáina caá. “Jwiít niḡat jéihnit jwĩ jumuchah, jwiítidih ñi túi weñeé”, ĩpĩ niijná yuh caá. Biíh láa yeebdíh íjnit, ĩ mao tícana caá. Páant yeejép yeebdíh ĩ chājachah yuhna, ¿Dépanihna páantjeh queétdih ñi túi jepah?

21 Ñijeéh jumna, “cāacwādhíh úmni”, ñi niijní, queét ĩ chājat pah weémboó wã chājcap be. Páant wã chājat pínahdih wã úmatjidih naóhna, wã tícana caá. Queét ĩ chājat pah chājcan yuhna, Jesús ã wahní wã jumatdih ñi túi jéihyat pínah niijná, weembút ded pah wã yapatjidih wã wēi naóhbiḡna caá.

22 Queétboó bita chah jéihnit jumíhna, “Jwiít judíowã jwĩ jumuchah, jwiítidih ñi weñeé”, yeebdíh ĩpĩ niijíp wut be. Obohjeéhtih, weembút judío mun tigaá. Queétboó “Jwiít Israel ã jumená, Dios ã ñionitji jwĩ jumna caá”, yeebdíh ĩpĩ niijíp wut be. Obohjeéhtih, weembút Israel ã jumá ma mun tigaá. Queétboó “Jwiít Abraham ã jumená, ‘Yeebdíh wã túi chāj wāhbiḡna caá’, Dios ã niijnítji caá”, yeebdíh ĩpĩ niijíp wut be. Obohjeéhtih, weembút

Abraham ã jũima mun tiguaá.

²³ Queétboó “Cristodih teo wãhñit jwĩ jamna caá”, yeebdíh ãpĩ niijíp wut be. Páant ã niijíchah joinít, nin pah yeebdíh wã niijná caá: “Weembát Cristodih teo wãhni mun tiguaá. Weém caá bácah queét ã tewat chah búdí teoni”, yeebdíh wã niij naóhna caá. Páant niij naóhna, páantjeh jenah joicánnit ã wéheat pah naóhna yahna, wã tíccan caá. Queét ã teo wãhat chah Cristodih wãpĩ teo wãhup be. Jesúih táini doonádih wã bohéatji peéh dawá láa nemat muúboó weemdíh ã nemep jĩ. Dawá láa weemdíh ã puñup jĩ. Dawá láa cáacwã weemdíh ã mao yohíhip jĩ. Páant ã mao yohíhichah, weém yeejép wãpĩ yapap jĩ.*

²⁴ Cinco láa jwiít judíowã jwĩ maáta weemdíh ãt tewat tũutup tajĩ. Weemdíh ã tewat jumat pah, tũbit yéej chãjnitdih momo jiwí chóo coóh jamni tõpnajĩh ã puñat biíc yoobó treinta y nueve láa weemdíh ã puñup jĩ.*

²⁵ Biíc peihcanni láa Romanowã weemdíh teonit, máa doóbhñajĩh ã puñup jĩ.* Biíc láa weemdíh mawíhna, jeejĩh ã yohop jĩ.* Biíc peihcanni láa búdí jãáj chóojĩh jib bejna, jwĩ daabáp jĩ. Biíc láa daabnít, máa naadíh teonit, búdí muj tacdih pah daa jãóh, caán yeó jáap pah tãah bej, jwúub pah túo bejat dée wã jamachah, ã ubup jĩ. Pánihna, caán láa, wã wñníhip jĩ.

²⁶ Dawá láa Jesúih táini doonádih bohénit, yuúp wã jib bejep jĩ. Pánih bohé jibnit, búdí yeejép wã yapap jĩ. Biíh láa tobohni mujnadih wã bejep jĩ.

* 11:23 Hch 16.23 * 11:24 Dt 25.3 * 11:25 Hch 16.22 * 11:25 Hch 14.19

Biíh láa namáboó jib bejehchah, bií déedih chewe mao dúuc wáyat dée ã tobohoh jĩ. Biíh láa wã déewãjeh weemdíh ĩ yéejahhip jĩ.* Biíh láa judíowã nihcannitbut weemdíh ĩ mawíhip jĩ.* Tútchinaboó, tútchi wihcapboó, búdí mujboobát wã jumuchah, wunat dée ã tobohoh jĩ. Biíh láa “Jwiít Jesúíhwã caá”, niij yeenit, ĩ mawat dée ã tobohoh jĩ.

27 Jesúíh túini doonádih bohéna, búdí wãpĩ tewep jĩ. Pánih teona, dawá láa ñocanjeh wã bohé daa jãúwáp jĩ. Dawá láa jeémát wihchah, ñuugúp tubuchah, tubit taca jootóchah, búdí yeejép wã yapap jĩ. Dawá láa dawat pínah yéguéhbut wihchah, búdí cubuhuchah, yeejép wãpĩ yapap jĩ.

28 Pánih yeejép yapna, páant bóojeh ãt nihcap jĩ. Yeó jáap jumat pah nihat Jesúíhwã “caandíh cádahná”, niijná, búdí wãpĩ náhni dahwana caá.

29 Biíc Jesúíh ã tubúp chũúúchah, weembát tubúp chũúhni pah wã jumna caá. Bitá Jesúíhdih ĩ yéej chãjat tútuchah enna, queét yeejépwãboodíh búdí wã íjna caá. Pánihna, yeéb nihat Jesúíhwã, wã weh dée ñi jumuchah, yeebdíh úum yacna, yeejép wãpĩ yapna caá.

30 Páant yeejép wã yapatjidih wēi naóhna, ded pah wã túi chãjatdih yeebdíh wã wēi naóhcan niít. Obohjeéhtih, wã wēpcatjidih yeebdíh wã wēi naóhbpina caá.

31 Páant wã naáwáchah joinít, “Yoobópdihi caá páant ã niiját”, Dios ã niij jéihna caá. Caán caá jwĩ Maáh Jesucristo íp. Pánihna, yeó jáap jumat pah “Paá, meemjéh nihat jéihni, chah wēpni caá”, túi wēi niiját caá náahap.

* 11:26 Hch 9.23 * 11:26 Hch 14.5

32 Weém Jesucristodih wã jwíih jepahat túttimahbitjeh, Damasco tútchiboó wã jumuchah, caán tútchidih moón ì maáh, Aretas nump jumni, weemdíh át tewat túutup wut jĩ. Pánihna, nihat Damasco tútchi wáihyat júdu jěcnadih áih soldadowãdih át páñat túut wut jĩ, wã bac bejehah ì tewat pínah niijná.

33 Páant ì páñachah enna, wã chéenwã búdí wãhdih weemdíh waadát túutnit, wáihyat júdudih jumni muá enat jěcmant ì cádah deyanap jĩ. Pánih cádah deyanit, ì teo wáacachah, moh yéejni wã jweyéj jĩ.*

12

Pablo oo júmat dée ã enat

1 Bũũ weemdíh ded pah biíh ã yapatjidih wã jwũũb naóhbipna caá. Queét yee bohénitboó “Jwiítjeh caá oo júmat dée jíghatdih enna, chah jéihnit jwĩ jumap”, ì niíj naóhna yah caá. Obo-hjeéhtih, jwĩ Maáh weemdíhbat oo máh enat dée pah ã jíghop jĩ. Páant ã jíghatjidih yeebdíh wã naóhbipna caá. Ded pah weemdíh ã jéihyaatdihbat wã naóhbipna caá.

2-3 Catorce jópchi jãtíh Dios weemdíh japboó ã ub púuh laab béjep jĩ. Ded pah ã ub púuh laab béjatjidih wã jéihcan caá. Wíih bácahdih, wíih caolihdihjeh ã ub bej déeji oo júmat pah enatjidih, wã jéihcan caá. Diosjeh caá ã jéihyep.

4 Á pebhboó, Paraíso wūt jumapna juibínit, ã naáwáchah wã joyóp jĩ. Jwiít cáacwãjeh jwĩ jéih naóh bũũjácát déedih wã joyóp jĩ. Páant caandíh

* 11:33 Hch 9.23-25

wã joyóchah yuhna, weemdíh ã jwúb naóh yapaat tútcap jĩ.

⁵⁻⁶ Páant weemdíh ded pah ã yapatdih wēi naáwíhna yuhna, weemjéh ded pah wã jummatdih wã wēi naóhcan níit. Obohjeéhtih, yoobópdi h ã jumuchah, wã jwúb naáwáchah nihna, ãta túi taga. “Pablo túini oo jummat dée pah enna, Jesús ã wahni nacaá”, ñi níij weñatdih yeebdíh wã náah yaccan caá. Obohjeéhtih, ded pah wã chãjatjidih, ded pah wã bohéátjidihbut jenah joinít, “Pablo jwĩ Maáh ã bohé jibat túutni caá”, ñi níij jéihyatdih wã náah yacna caá. Weemjéh wēpcanni wã jummatdih ñi jéihyat pínah níijná, buu ded pah bíih wã yapatjidihbut yeebdíh wã naóhbipna caá.

⁷ Chah túini oo jummat déedih enna, “Weém caá bácah chah jéihni”, wã níij jenah joyát weemdíh ã tobohna caá. Páant ã tobohah pínahdih jéihna, Dios Satanásdih weemdíh yeejép át yapat túutap taga, “Weemjéh wēpcanni caá”, wã níij jenah joyát pínah níijná.

⁸ Pánih jumna, bíic peihcanni láa jwĩ Maáh Jesúsdi h caán yeejép yapatdih ã yohah pínahdih wã úbúp yuh be.

⁹ Obohjeéhtih, weemdíh nin pah ã níij jepahap be: **“Caandíh wã yohcan níit. Obohjeéhtih, caandíh yohcan yuhna, meemdíh búdí oinit, wã túi teo wáacbi pna caá. Pánih wēpcannijeh jumna, wã oi teo wáacat pínahdih chah ma bidbi pna caá. Pánihna, meemdíh búdí wã teo wáacachah ennit, wã wēpatboodíh ni hat cãacwã ĩ jéihbi pna caá”**, Jesús weemdíh ã níij jepahap be. Páant ã níijchah joinít, wã wēpcatdih wã wēi naóhbipna caá, ã wēpatjĩh weemdíh búdí ã teo wáacat pínah níijná.

10 Páant tigaá Jesúih wã jummat jíib yeejép yapna, búdí wã wëina caá. Bitá weemdíh yeejép ï wéhenachah, yeejép ï chãjachah, ï jĩgahanachah, dedé biíh weemdíh yeejép ã yapachah yuhna, wãpĩ túi jumna caá. Pánih wëpcanni wã jumuchah, Jesús ã wëpatdih chah búdí bidnit, “Weém jéihcanni wã jumna yuhna, ã teo wáacatjĩh wã túi bũjábipna caá”, wã niíj jéihna caá.

Corinto tútchidih moondíh búdí ã jĩgahat

11 Bitá weemdíh yeejép ï naáwáchah joinít, yeéboó queétdih ñi naóh bóod chũñuchah, ãta túi tagaá. Obohjeéhtih, páant ñi niíjcáh, weemjéh yeebdíh wã míic wëi naóhna caá. Weém oboh jumni dée wã jumuchah yuhna, queét yee bohénit “Jwiít caá bácah Dios ã bohéat túutnit”, niíjnítboó wã chah ï jumcan caá.

12 Ñijeéh wã jumuchah, Dios ã naáwát túutni wã jummatdih júutihna, ã wëpatjĩh weemdíh búdí ãpĩ teo wáacap jĩ. Páant ã teo wáacachah, dawá láa wunnitdih boonanit, nemépwãdihbut wã yohop jĩ. Pánih chãjnit, jwiít cãacwã jwĩ jéih chãjca naáhdih ã wëpatjĩhjih wã chãj júutap jĩ. Weemdíh eníhcannit ï yéejáihichah yuhna, wã chũná yuhna, wã teo cádahcap jĩ.

13 “Pablo jwĩjeéh jumna, biíh tútchidih moondíh ã túi chãjat pah jwiítidih ã túi chãjcap jĩ”, ¿yeéb ñi niíj jenah joí niít? Nihat tútchidih moondíh biíc yoobó wãpĩ túi chãjna caá. Obohjeéhtih, yeebdíhjih wíih pínah dinerodih wã uúbh tac bũgácap jĩ. ¿Pánih uúbh tac bũgácan, yeebdíh wã yéej chãjnit jĩ? Caán yeejép ã jumuchah, wã jĩgahna caá. Caán yéejatdih weemdíh ñi yohoó.

Ī pebhna ā jwūub jib bejat pínah

14 Nin wā naáwát pínahdih ñi túi joyoó: Chéne láa juibíniji buu ñi pebhna jwūub bejat túut caá wā chājap, páant mantih. Ñi pebhna juibínit, yeebdíh wíh dinero pínahdih con láa wā úbhcatji pah, buu láabut wā úbh tac buugácan niít. Níih dinerodih náahcan, Jesúsdi h túi joinít ñi jumat caá yeebdíh wā náah yacap. Wébít ĩ mána ĩ náahatdih wāhñit pínah nihcan caá. Obohjeéhtih ĩ mána caá queét wébítboodíh ĩ náahatdih ĩpĩ wūhup. Páant ĩ chājat pah yeéb wā weh panihñit ñi jumachah, wā náahatdih yeebdíh wā úbhcan niít.

15 Ñi ĩp panihni jumna, yeebdíh bádí oinit, ni-hat wā bíbohatdih wēi wāhñit, yeebdíh wā teo wáaquíhna caá. Pánih teo wáaquíhna, bádí chunná yuhna, wā teo cádahcan niít. Páant yeebdíh chah wā oyochah yuhna, ¿yeéb weemdíh namp ñi oi niít?

16 “Pablo jwíjeéh jumnit, áih pínah dinerodih āpĩ úbh tac buugácap jĩ”, ñi niúj jéihna caá. Obohjeéhtih, biquína ñijeéh jumnit weemdíh nin pah ĩt niúj jenah joi tágaá: “Jwíh dinerodih moh yéejnitdih ā wūh wáacat túutnit, jwiít dih jéihcha dúuc wáiniabeh tagaá”, ĩ niúj jenah joiná caá.

17 Páant ĩ niiját pahjeh chājni jumna, ¿ded pah tigua caandíh wāta nih chāj? ¿Ñi pebhna wā wahnitdih nit beé yeebdíh wā jéihcha nuumát túutup? Páant wā chājcap jĩ.

18 Játih Titodih ñi pebhna bejat túutnit, biíh Jesúhdihbut ájeéh wā pej jum bejat túutup jĩ. Páant ñi pebhboó juibínit, ¿Tito yeebdíh ā jéihcha nuumnít jĩ? “Nuumcánni caá”, ñi niúj jéihna caá. Jwiít chénat

pah biíc yoobó jwĩ maáh ã weñat pínahdih chājnīt caá. Pánih jəmñit, yeebdíh oinit, táinijeh ã chājat pah, weembát biíc yoobó yeebdíh táinijeh wāpĩ chājna caá.

19 Páant wā jāh niijíchah joinít, ¿ded pah ñita niij jenah joí? “Caandíh jwĩ wēi niiját pínahdihjeh caá ã bidip”, ¿ñi niij jenah joí niít? Obohjeéhtih, weém Cristoíh jəmna, Dios weemdíh ennit, “Ma túi chājna beé”, ã wēi niiját pínahdihjeh caá wā náahap. Yeebdíh teo wáaquíhna, ded pah wā chājatjidih wā naóh beedánap be, jwĩ Maáhdih chah ñi túi jepahat pínah niijná.

20 Ñi pebhboó wā juibínachah, wā náah yacat pah ñi chājcah, búdí yeebdíh wā úum yacna caá. Páant ñi túi chājcah, caanná juibínit, weembát yeéb ñi náah yacat pah wāta chājcan tagaá. Pánihna, yeebdíh búdí wā jenah joiná caá. ¿Páantjeh ñi míic jūih niít? ¿Páantjeh bitaíh bií déedih ñi en ñinah íj niít? ¿Búdí ñi míic íija niít? ¿Biquína páantjeh íih pínahdihjeh bid niít? ¿Būubut páantjeh bitadih ñi yee naóh niít? ¿Yeejép dooná ñi jumatdih ñi cádah jwuhcan niít? ¿“Weém nihát jéihni caá”, páantjeh ñi míic wēi niij niít? ¿Tūbit ñi míic en naóh cádah jwuhcan niít? ¿Yeéb biquína ñi jenah joyát dihjeh niít ñi chājap? Yeéb páant ñi chājatdih wā úum yacna caá.

21 Pánihna, ñi pebhna juibínit, ñi túut nuumcát dih wā enechah, Dios weemdíh āta tíicat túut tagaá. Jon jātih yéej chājnitji dawá páantjeh í yéej chājatdih cádahcah enna, búdí wāta jīgah taga. Íí náah chājat, yeejép chājíhat jenah joyát, í náahat pahjeh chājatdihbut í cádahcah enna, búdí wāta jīgah taga.

Páant ñi chãjatdih páant bóojeh ñi cádaahaá, caanná juibínit, wã jũihcat pínah niijná.

13

Pablo ã pée naáwát

¹ Jon yeebdíh chéneji juibí enniji bũũ bejna, biíc peihcanni láa bejat túut caá wã chãjap. Pánihna, ñi yéj chãj cádahna, túiniboodíh túut nũũmnít, weemdíh ñi túi páñaá. Ñijeéh jumnitdih í yéj chãjatdih cádahat túutnit, Moisés nin pah ã níj naóh daacátjidih ñi túi náhninaá: “Deddih ñi peéh chãjat pínah jãtíh, caán ã yéj chãjachah ennít, chénewã, biíc peihcannít í enatji pahjeh í naáwá naáh. Páant moonjéh í naáwát túttimah, ñi peéh chãjachah, ã túibipna caá”, Moisés át níj daacáp tají.*

² Ñi pebhna wã jwúub juibí láa yéj chãjnitdih nin pah wã níj naáwáp jĩ: “Ñi yéj chãjatdih cádahnit, túiniboodíh ñi túut nũũmú. Ñi cádahcah, jwúub juibína, wã peéh chãjbipna caá”, wã ni-ijíp jĩ. Páant wã niijátji pah, bũũ ñijeéh jumcan yuhna, queét páantjeh yéj chãjnitdih, yeéb nihatdihbut, wã jwúub naóhna caá. Páant bóojeh, ñi yéj chãjatdih cádahnit, túiniboodíhjah ñi túut nũũmú. Ñi pebhna juibínit, ñi cádahcatdih enna, búdí wã peéh chãjbipna caá. Yúúp wã jumachah, “Wã peéh chãjbipna caá’, niijná yuhna, ã peéh chãjcan níít”, ñi níj jenah joicá bojoó.

³ Cristo ã naáwátidih naóh yapani wã jummatdih ã júutat pínahdih bidna, páant wépép weemdíh ã peéh chãjat túutuchah enna, ñi jéihbipna caá. ¿Búdí

* **13:1** Dt 17.6; 19.15

ã wēpatjĩh yeebdíh ã teo wáacatjidih ñi náhnican niít? Yeéb yéej chãjnitdih ã peéh chãjat pínahbut biíc yoobó wēpép ã jumbipna caá.

⁴ Jwiít cãacwã jwĩ wēpcat pah Cristo wēpcanni jũana, cruzboó ãt wun wãhup wãt jĩ. Pãnih wunna yũhna, Dios ã wēpatjĩh boo pud jũóhniji, buu páantjeh báadhni ã jũana caá. Cruzboó ñũhna, wēpcanni ã jumat pah weembút wēpcanni wã jũana caá. Wã jenah joyátjĩhjuh yeebdíh wãta jéih teo wáaccan tagaá. Obohjeéhtih, Cristo wãjeéh jũana, Dios ã wēpatjĩh yeebdíh teo wáacadih wã juibíipna caá.

⁵ Yeéb mícjeh nin pah ñi míc niúj wúbh joyoó: “¿Ded pah wã chãjatji? ¿Yoobópdih Jesúsdiuh wã jenah joí niít? ¿Caán ã náah yacatdih wã túi jepah niít?” ñi míc niúj wúbh joyoó. Caandíh yoobópdih jenah joiná, ã náah yacatdih ñi túi jepahachah, Jesús ñiuh caolihboó ã jũana caá. Obohjeéhtih, yoobópdih caandíh jenah joicán, ã náah yacatdih jepahcan, ãihwã ñi nihcan caá.

⁶ Weémboó caandíh túi jenah joiní, ã náah yacatdih jepahni wã jumatdih wã jéihna caá. “Weém Jesúsíh caá”, niúj yeeni wã nihcan caá. Páant wã jumatdih yeebdíhbut wã jéihyaíhna caá.

⁷ Ñi yéej chãjcat pínahdih náah yacna, Dios yeebdíh ã túi teo wáacat pínah niijná, búdí wã wúbhna caá. Ñi pebhna juibínit, páant ñi yéej chãjcatdih wã enechah, weemdíh Dios yeebdíh ã peéh chãjat túutcan niít. Páant ã peéh chãjat túutcah, wã wëibipna caá. Obohjeéhtih wã peéh chãjcatdih ennit, “Pablo Dios ã wēpatjĩh queédih peéh chãjcan, Dios ã wahni nihcan nacaá”, ñi niúj

jenah joyóchah yuhna, wã táí wēibipna caá. Dios weemdíh ã bohé jibat tútatjidih ñi jéihyat pínahdih wã náah yacna yuhna, yeéb ñi táí chājat pínahdih chah wã náah yacna caá.

⁸ Ñi yéej chājatdih cádahnit, táiniboodíh ñi túut nuumátidih enna yuhna, yeebdíh wã peéh chājachah, yoobópdih āta nihcan tagaá. Pánihna, yoobópdih chājíhna, yeebdíh wã bohébipna caá, Dios naáwátidih táí beh joinít, chah ñi jepahat pínah niijná.

⁹ Yeéb Cristodih ñi táí jenah joyóchah, Dios ã wēpatjīh yeebdíh peéh chājat ã náahcah, búdí wã wēibipna caá. Pánihna, Diosdih búdí wã uúbhna caá, ã weñat pínahdihjeh ñi táí chājat pínah niijná.

¹⁰ Dios ã wēpatjīh yeebdíh peéh chājíhcan, ñi pebhna wã bejat pínah jātih wã daác wahna caá, yéej chājatdih cádahnit, ñi túut nuum páñat pínah niijná. Dios ã wēpatjīh yeebdíh jīgahaihcan, wāpī táí bohéna caá, ñi táí jumat pínah niijná.

Pablo ã pée túyat tútat

¹¹ Buu wã úudwã panihnitá, yeebdíh wã túyat túutna caá. Cristodih chah jenah joinít, táinijeh ñi jumuu. Nin wã naóh daacátidih ñi táí jepahaá. Cristodih chah jenah joyát pínahdih ñi míc teo wáacá, biícidih táí jumat túut niijná. Páant ñi táí jumuchah ennit, Dios ñijeéh ã jumbipna caá. Caán jwiítidih búdí oinit, míc oyat túutna, jwiít biícidih ã táí jumat túutna caá.

¹² Jesúíhwã jumna, ñi táí wēi uúbú.

¹³ Nihat ninjīh moón Jesúíhwābat yeebdíh búdí ĩ túyat túutna caá.

14 Yeebdíh búdí wã uúbhna caá, jwĩ Maáh Jesucristo yeebdíh oinit, ã táí teo wáacat pínah ni-ijná. Dios búdí ã oyatdih ñi jéihyat pínah, Túini Espíritu ñijeéh ã jumat pínah, yeéb bíicdih ñi táí jumat pínahdihbut wã uúbhna caá. Pánih uúbhnit, yeebdíh búdí wã túyat túutna caá.

Páant bóojeh tigaá wã naáwát.

Pablo

Dios ã jáap naáwát tólih New Testament in Cacua

copyright © 2008 Wycliffe Bible Translators, Inc.

Language: Cacua

Translation by: Wycliffe Bible Translators, Inc.

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cacua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022
34c9543b-57a6-5290-ab7b-4fa15529a7e2